

Иосиф Бахшиев

ПЪЕСЕГЪО

*Сборник пьес
на языке горских евреев – джуури*

«Sholumi»

Центр сохранения и развития национальных традиций,
самобытности языка, культурного и исторического наследия горских евреев

Israel, 2017



Центр «Sholumi» выражает благодарность
президенту Международного Фонда СТМЭГИ,
вице-президенту Российского Еврейского Конгресса
д-ру Герману Рашбиловичу Захарьяеву
за содействие в издании этой книги.

Иосиф Бахшиев. Пьесегьо.

Сборник пьес на языке горских евреев – джуури.

© «Sholumi», 2017, Israel

НОЧОГЪ

Пьеса эз дуь перде

Возиренигъо сифотгъо:

Митьке – шаздасала кук

Сиин, Ханче – хьовиргъо ю

Зине – дедей Митьке

Зэрэхьно – холуй Митьке

Абрам Семенович – духдир

Хьово – дуьдер той Митьке

Хивит – духдир, э комики Митьке ошугъи

Екимуьн перде.

Нечогъигъоре гъобул сохденигъо корсох больнице эри нешу-модордегоргъо нуьшди эки шильхьон духдир Абрам Семенович комики эдее чуйниге нуьвувьсде. Медицински хэгьер Наташа эдее анализгъо гъуьч сохде.

Абрам Семенович (*сэхд сохдени дефтере*): Эри е серсонигеш нечогъи жиге гъишдем. Чуй мибу имбуруз, Наташа, туь э чуй хьол дери?

Наташа: Согъбоши, зобу нисдуьм. Расди кор омбари.

Абрам Семенович: Гу гЭйбиревоз гуьре бисдогеш. Ненге э больнице э хотуриревоз мидефуьрсуьм. Хос мисохим (*хэндуйсдени*).

Наташа: Ой, ишму гене э зарифетгъой хуьшдеревозит...

Абрам Семенович: Зарифет эричуь. Эки иму эждогъое мердгъо зенгъо де. Рэхгъой худоре иму нисе дануьсденим.

Эз дер кувфденуьт. Диреморенуьт Зине ве Зерэхьигьо. Доренуьт дуй екире шолом.

Абрам Семенович: Чуй дуйлести овурди имшуре эки иму? Ченд хуьрметлуье кифлетгьои э шегьер. Ишмуш еки эз угьоит. Митьке школаре э медалевоз варасди...

Зине: Гоф иму э товун энунуи. Худе мебуро бегьеме мерд бири. Эдем гуфдире: хоим эри туь е гуьзеле духдере. Хьовои нум ю. Бебе-дедешуре хуб шинохденуьм. Худо мебуро бэхд девлетменде кифлети, кукгьош нисди ишуре, туь э жигей эн угьо мибоши.

Оммо Митьке сенгье хуно депичири: "Ме энжэгь Хивите хосденуьм. Ненге мере зен герек нисди". Оммо эдее диренуьм лап гереки э гуьмуьруь гуьре.

Чуй сохумге нисе дануьсденуьм.

Абрам Семенович: Э миллет иму гьэдоти и коргьо, э гоф бебе-деде денишире. Хуб нисд, хуб нисд. Омо иму е чоре миофим. У ночогини, нум гьисди вогосире фикир. Хуб мисохим .

Зэрэхьно: Эхи эз хэлгь биёбурини. И больнице больницегьойгере хуно нисди. Хубе кор нисе ведиреморе .

Абрам Семенович (э динжиревоз): Уш дузи.

(Зине евошлей денорени э куьф халат эн Абрам Семенович е гьэм пуле):

Иму гьисмет кифлет имуре э ишму дореним. Бовор сохденим дуз миёрит коре, чуьнки ишму лап дуйруьсде одоми хьисобит э гьэрей хэлгь. Митькеш э имуревоз омори, э хьэети, э уревоз милиционери энжэгь женг не ведиров. Митьке женгесуриш нисдиге, кидан, хьэз ниёв уре и кор. Омо э нечогьэ гофгьой энумеденишит, диревунит уре э палате, хос сохит, у варасуь энжэгь гьисмет

эну Хьовой. Иму диеш согъбоши мигуим кор варасде, дуз бисдоге.

Абрам Семенович: Дие гоф зиеди, огол зенит уре.

Диреморенуът милиционер ве Митьке.

Абрам Семенович: Гофе дураз не сохум. Туь, Митьке, дан: э ме егъин гуфдирет, ки туь эз торике шев терсире, бегъем нис хисире шев. Зарал нисди, хос мисохим, жунсогъи мивегордуним туьре, согъ мисохим мэгІэной туьре...

Митьке: Чув? Терсиренуъм... Нисе хисиренуъм... Мере больнице герек нисди. Не хисирейме эз муьгъбети. Дур бошит эз ме, ме рэхъ мере бурам.

Абрам Семенович: Дие меденишит. У имуре хуб мидануь. Наташа, зу сох укол. Берит ночогъэ э палате.

(Шекуьл дегииш бире. Палатеи. Караватгъои. Э еки Митьке дегеишди. Сифот ю сокити. Эдее гуфдире):

"Чуьтам бегем? Хьовош раче духдери. Токи мере хубе одохлу бу. Э меревоз дуьл э дуьлевоз зию".

(Диреморени Абрам Семенович. Шиновусдени гофгъой Митькере, юш гуфдирени):

"Имогъой дануьсди балай ме тегъьер коре. ГІэдот миллете хогъин сохде нибу, гереки э гоф деде денишире. Гъемме дуз миёв. Дедей туь бэхдевере зени, туьре лап хосдени, не пул, не мол эри туь гъимиш нисе сохде.

Митьке *(э руьхъшендиревоз):* Бэхдевери ю ведини.

Абрам Семенович: Дедейтуьш э Хьоворевоз миёв э ки туь. *(Митьке дениширени э иловле. Чоресуьзи хурдени дермуре. Хисирени).*

Себэхимуни. Э ки Митьке оморени дедей ю ве холу.

Зине: "Чуьтами гъовой туь, хэлеф ме? Шев хисиренге пуьрсирем эз духдиргъо гъовой туьре. Серлей туь дорд нисе доре"?

Митьке: Ме нечогъ нисдуым. Туь э гужевоз эри ме эдее Хьоворе хосде. Гуфдирей туь бугу биренигъо песде песдеинеи. Де рэхь элелуьге нисди эри ме.

Зине: Муьрдум эз шори. И Митькей мени. Чуть раче гофгъо, чуть динжи гъечу гоф миё соху э жеендимире дедеревоз. Эри туь хуб не бисдоге, ме уре ниhoюм, ме э у соймиши нисдуым.

Зэрэхьно: Де шеним и гофгъоре. Ини Митьке екем дерму туь хури эри сокити дуьл туь.

(Митьке хурдени дермуре:) «Гьемме энтигъэи» *(хисирени)*.

Зэрэхьно: Гуфдири э ме духдир дуь руз больнице бие веси. Э хунеш иму дерму гЭребир биё дим. Песде кем-кем дермуре кем мисохи, миварасуьни доре. Гьемме иму сохдеймо фикиргъо дуз миёв.

Зине: Эз ме гуьре деде нисди э гУьлом.

Зэрэхьно: Туь чуьни деде. Тэхьное куклере гьимиш не сохдей э хотур гЭдотгъой бебегъо. *(Рафденуьт)*.

Дуьимун перде "Азади".

Э ки Митьке э гъирогъ каравот нуьшдени е ночогъ.

Митьке: Туь кини?

Ночогъ: Ме хэрум.

Митьке: Инжо чуть жигеи?

Ночогъ: Мигьмонхоне эри хэргъо.

Митьке: Чуть дузе гофи? Чутьтам не дирем ме хосиет, чигьрет дедеймере? Э ижире жиге мере э фурмундеиревоз овурди.

Ночогъ: Дие хэр мебош.

Гирошдени се руз. Хуней Зинеи.

Зине: *(Э хэьбергилигъой хуьшде)* Гьемме хьозури? Кейвони кор хуьшдере сохди? Сазандаргъооморет? Дие э кумеки худоре-

воз тамада сер гиригу. (*Дироморени Митьке*). Эз гьемме шоре руз э Гуьмуьрмени.

Митьке (*евош*): Сие руз. (*Сэхд*) Лап дузе гофи.

Перде.

Утогъ хунеи. Хьово эдее гІэиле ненуй-ненем сохде, хисунде.

Хьово: Имогой се мегъи куклей имуре.

Митьке: Косибле хьофд мегъе эз деде хьэсуьл омор.

Хьово: Ненге худо мебуру жунсогъи ю лап хуби. Расди суьфде екем сугьрусдебу. Э Митьке, туь эз дуьли хосде мере? (*Митьке э хуьшде домунди. Нисе дануьсде, чуь гуьге*).

Хьово: Ме хьол туьре дануьсденуьм жогъоб не доригеш. Туь ночогъиш не бирей. Ненге ме э гъэрише мерд э шуьвер мирафдуьм? Гьемме тэхсиркор муьгъбет туьни э ки Хивит. Ечиш нибу, рузгъо мигирору туь уре э ер туьш ниери. Э меревоз хуте мибоши, хуби ве зобуниш э меревоз бэхш мисохи.

Митьке: Белки, туь дузи. Нисе дануьсденуьм. Екем фикир сохде гереки. Э ме гуьфдирет, ки Хивит э шуьвер рафди э Гошире одоми э Москов. Туьре эз у хэбер нисди? Ишму, кидан, той екинит.

Хьово (*хэндуюсдени*): Шигъили у гофгъо. Хивит э хуне дери. Гуьфдири: Митьке гъисметмени. Мере эз у бэгъэй шуьвер герек нисди.

Митьке (*шор бирени, песде э могъбулиревоз*): Нэг1, ме имогъой кифлете, зене нишенуьм.

Хьово (*э келе шориревоз*): Расди гофгъой туь? (*не сохде гузет э жогъоб ведироморени эз утогъ*).

Диреморонуьт Сиин ве Хэнче. Гъэл гирденуьт дуь екире.

Сиин: Чуьтами гъовой туь, хьовир? Эз больнице ве дургуне гІэруьси э хуьшде омор?

Хэнче: Чув фикир сохде эри эни коргьо? Иму э вэгдой ю мидануьсдимге нигьшишдим туьре э больнице эки гьэрише одомигьо дешенде. Э жун деде.

Митьке: Э, гьемише э гьер жиге зинде одомигьои. Мере э больнице екиш гьэйри не сохди. Дермуреш дие ние хурденуьм. Сер ме гуйге эдее темиз бире.

Сиин: Туь мере дануьсдени. Ме хэбербери е вэхдиш не сохдем. Оммо зентуь туьре нисе хосде. Уре пэхьникие ошней э шегьер. Гэилиш эн туь нисди, эз у бири...

Митьке: О, Худо туь куьшди мере. Бошку, гоф миофум, эз и садан хилос мибошум. Токи Хивит эз ме дес не вегируь. (*Вегирденуьт куьрсигьо.*)

Нуьшденуьт. Хьово диревундени шишей шороб ве закуске. Гьенжиренуьт кем-кем...)

Хэнче: Зурбои коргьой гьуьлом. И Хьоворе, и дедей туьре чув герек бу гуж сохде э туь?

Митьке: Кидан, кидан. Бурайм э куче. Екем темизе эвир э нефесовоз кешим. Ме эз и хэбергьо эдее лол биренуьм.

Себэхьимуьн. Кучей шегьери. Дуь дори. Гирошденуьт одомигьо. Митьке поисде нежумусьде, эдее фикир сохде. Оморени раче зенине сес: "Митьке"! У бу Хивит.

Митьке: Туь чувтами, хэгьерме?

Хивит: Зобу нисдуьм, согь-саламет (*Оммо чаруьсдени э е лойге, гирисдени*).

Митьке: Чув? Туь гирисдени? Эз расдекиш мере те имогьоиш хосдени? Метерс, ме гьемме коргьоре дуз мисохум. Гьич э хэпертуьш мебугу. Муьхькем бош. Иму егьин э еки мибошим.

Гирошдени дуь орине. Митьке оморени э хуней Хивит. Вохурденуьт э еки.

Митьке: Хивит, жун ме, жигер ме. Гьуьч сохдем гьемме коргьоре. Дорем э дивун эрзо. Гьемме очугь бисдо. Эхиркорк ме

гуфдиренге, ки гІэил Хьово эз кеси, дивунчи дие гоф не сохд, кеши э когъоз гьул.

Нуьвуьсд: Тологъ. Имогъой ме азадлуьнуьм. Нум ночогъиш эз ме вегирде омо. Мибошу имуре мозоллуе кифлет.

Хивит (э *гІэрсоревоз*): Муьгъбетме.

Митьке: Ме дарафдем э кор э е идоре. Жигеш вегирдем э общежитие. Эз хуней энун ализе дедей ме ведироморем. Чуькле гІэруьси дуь-се хьэрмэхьевоз ве миросгьоревоз мисохим. Хуней кифлети э общежитие мивегиним. Гемме дуз мибу.

Шохьонгум энун руз. Митьке э пушой дерьегъ поисди.

Митьке: Чуь зурбои дуьнегъ. Чуь лезетлуьни эвир эн азади. Бегем э больнице той мибу? Меш офдем мозол мере, Хивите. Дие уре нибу себеб эри гирисде. Ме уре субит мидуьм. Зинде гуж келеи. Э гьемме жигеш эдее борж рафде э гІэрей девлет ве бирори. Ме гьеммише э тараф бирори инсонгьоюм. Рэхь э пушой ме очугъи. Е эри эн у борж бие зию бегьеме мерд. Ненге чуьни, пул эз одоми звери. НэгІ, гьечуь ние бу!

П е р д е .

М Е Т Л Е Б Г Ъ О Й Ж О В О Н И

Возиренигъо сифотгъо:

Бен – 18-сале жовон

Герц – хьэрмэхь ю

Дибие – хьэрмэхь ю

Мелке – дедей Бен

Туьруьнж – жовоне духдер, той Бен

Расде фольчигъо – Темизи, Дуьруьсди, Гуьзели

Шефде фольчигъо – Мурдали, Дургуни, Беденишони

Екимуьн перде.

Бен вогошдени эз корхоне. Нуьшдени э куьрси эки гиргине шильхьон.

Дироморени Мелке.

Мелке: Чуь хэбери, кук ме? Жиге кортуь эз песой варасдеи школере суьфдеи руз чуьтам? Эз дуьли туьни небуге?

Бен: Эз суьфдеи руз визор оморем эз и кор. Бен биер у карас-тире, бен, кеш, эз у тел. Гье буйругъи!

Мелке: Чу сохде бие биев кук ме? Туь гьелем шегуьрди. Тоб ди, усдош мибоши. Михуни э сениг'Эт хуьшде. Соводиш мивеги-ри. Бошку гьемме кор э тегьери ю мибу, Чи э кинлеи, деки ху. Ме имишев э гьовилхуне э ки куьнде мирос иму бие бурам, эри хисиреш нием (*рафдени*).

Бен: Чуьниге хэсде бирем. Эри чи декуьрдеш гьувот нисди. Лап хов де.

(Норени сере э сер шильхон, хисирени э гофгьоревоз: Песде чуйтам мибу, и?)

Нимеетовуш бире. Диреморенуьт шефде фольчигьо, веже-гьисденуьт э иловлей шильхон хунденуьт мэгИни:

Мурдали: Ведремориге э черх.
Зурбое зиндегуни,
Тенг бисдоге эй туь рэхь,
Хьовире э дере мивенгени.
Токи эй туь бугу хуб,
Негируь дерд кес.
Кунбологьово мирав чун туп
Эри туь мибу хуш нефес.

Дургуни: Э гьер жиге хэре оф,
Эри фурмунде зуте,
Эри хьэз шенди гоф
– Ранг суьрхе мивини зерде.
Ше неогье-бугу пул.
Чендгьэдер воисд.
Гьеммише метлеб э дуьл
Сарф туь эй туь гьисд.

Беденишоне: Гу эз рач мейму-мейму
Эз бирач гу – жон
Гьошгьой ю чуйн тиркому
Мигиру фасон

Товуши эдей вогошде, фольчигьо вирихденуьт. Бен эз хов хэ-бер бире.

Бен: Хэндее хов ме дирем. Э чуй бовор сохум. Гьемме хунде гофгьо э ёрме хуб мунд, гье у мибу. Э жун дедейме! *(Дироморенуьт Герц ве Дибийэ, доренуьт руз э хэйр бу).*

Э гьуьбет ишму э хэйрбу, чуйтами гьовошму? Шиновусдем ишму эеки дарафдет эри совод вегирде э техникум. Кидан, имогьой мере шоломиш нидит.

Герц: Руьхшенди месох дие. Песди иму бегем бироргилигьо нисдим. Эри хуним э е нефес гьерсейму мэгИни имуре.

Хунденуьт:

Чуй бисдогеш э гИуьлом
Иму мимуним эеки
Кумеки мидим э у тутем томом,
Пэхьни нибошим, чуйн туьлки.

Эри пое дуз ни э е сине хуним мэгИни «Дуразе рэхьи э пушо Хун иму нибу тиршов» (*Хэндуйсденуьт*).

Бен: Гереки э зиндегуни дильбош бире. Суьфдеи чи пули. Кире пул гьисдиге – уре хуьурметиш мибу, девлетмишиш э хуне, э кифлет.

Герц: Иму мэхьтелим. Эз кеевоз туь эз гьемме чигьо пуле вихдей. Гьевел туь гуфдирембири, ке сервелуье метлебтуь гьисди рач гуьзел эри согьэ гИумуьр дуьлеш миди. Чуй дегиш бисдо э муьвэхьтуь и кутэхьэ вэхд?

Дибий: Меш чуйниге нисе варасиренуьм, туь, Бен, э и гофгьоревоз гуйге е одомигеи.

Бен: НэгI, ме имогьой дузе рэхь офдем. Пул бисдоге, гуьзеле ме э ченди чиге мибу, Герц,

Дибий: НэгI, иму рази нисдим, гофгьойтуь эз кеси, кидан эз садани.

Бен: Мизигьим-мивиним, ки дуз ведиромоге.

Дуймуьн перде.

Хуней Бен дегиш бире. Гюшире чигьои. Ю нуьшди э сер нерме диван э тозе кастум вокурде. Э герден ю суьрхие зенжили, э дес ю энгуьшдери э келе жовоилевои, суьрхине сэгIэт э браслетоветовоз. Эдее коньяк хурде э гьэнфитевоз.

Бен: Ини ме расирем э метлебгьойме, дие чьуниге шори нисди э дуьлме. Эри чьуь бу?

(Дироморени Туьруьнж).

Туьруьнж: Руз ишму э хэйр бу, холей Милко э хуне де? Дедеймере гуллугьы э ки энуге, эдее огол зере э хунейме.

Бен: Чьуь гуьзеле духдери туь, чьуьтами нум туь. *(Туьруьнж гуьфдирени, сифот ю екем гьирмизи бире эз г'эйб).*

Бен: Элле, туь лап г'эйбкешики. Гу метлеб туьре чьужире булши, пойвоку, суьрхине гуьлбогь туьре восисдени – гьеммере миофум эри туь.

Туьруьнж: Ишму чьуь гуьфдиренит э ме. Ме ишмуре нисе шинохденуьм, суьфдеи гиле дирем. Песде мере чигьой кес эйчуйни?

Бен: Бебевой! И чьуь келегедини? *(Бен хундени мэг'Ини):*

Э пушой суьрх ниветови
Лап бисдоригеш гуьзел
Дуьлестгьоре фурмуш сох, у хови
Э пушой девлет мипои мэхьтел .
Э жовоне духдер
Диро э киме воку дер
Миваравунум эз пой э сер,
Эз гьемме мибоши звер.

Туьруьнж: *(Туьруьнж жугьоб дорени э мэг'Ини хуьшдеревоз):*

Пул – хокоруни, суьрх – мурдали
Эз гьемме зобуни эри койли
Е теке пулме бисдоге темиз
Нибошум гьич ме эз кес г'южиз .

Туьруьнж рафдени.

Бен: Иму гьелем миденишим чьуь звериге: пул ненге дуьруьсди?

Дироморени Мелке.

Бен: Э ки туь е гуьзеле духдер омореву, нум ю Туьруьнжи.
Дедешу туьре огол зери.

Мелке: Эри? Бурам зу.

Бен: ТэгІди месох, шинов мере: ме э той зен хосде бирем. И духдер лап зу дуьлмере берди. Михогьи эриме уре.

Мелке: Иму э ижире вэгІдоим – и духдериш бие эз дуьли ра-зи бу эри э шуьвер рафде. Кидан, миденишуьм.

Бен: Э инжо эри денишире вэхд нисди. Дуьлме эдее сухде. Е гьэм суьрхе хэржи мисохум, энжэгь Туьруьнж бошу эн ме.

Мелке: Мере воисдебу пуьрсире и суьрх девлет эзже омори э хунейме? Э дуьруьсде жофоревоз э е-дуь сал ингэдер пул ниве-гини, негуи э меш жигей девлеттуьре.

Бен: Эри девлетменд бире эгьуьл гереки деде. Туь гу гуллугь мере мисохи, воисдени туьре гІэруьсе овурде эри офдуме куктуь?

Мелке: Мисохум чуй эз десме веромоге.

Бен нехэбереки вехуьшдени, у нисе дире кей дер вокурде омореве э утогь евошлей дироморени Герц ве Дибийё.

Бен: (хундени)

Туь эже рафдей духдер
Сермере сохдей туь гиж
Мизигьисдим тевесер
Мибисдо эгьуьлме тиж
Нидануьм хунде туьсуьз
Омори сие думон
Гьечуь вешенденуьт туз
Корсохгьойму э хьэрмон
Гуйге куьнди туь Туьруьнж
Оммо дури вилеет
Ини поисдем заруьнж
Месох мере гьечу бед

Гьисдуьм эритуь хьозур
Согъэ догъэ векенде
Оммо мимуни туь дур
Э пушой Худо-бенде

Герц: Чув раче мэгИнини, туь бегьем шогьир бирей, Бен-хьовир. Гуйге не бири и салгьо кейки туь э посой пул, суьрх видовусде, имуреш куьнде хьовиргьойтуьре фурмуш сохдей. Чутьтам бири и дегиши?

Дибие: Гу иму очугь сур коре белки миданим эри туь кумек бире.

Бен: О кугьне хьэрмэгьойме, дуь сал недирем ишмуре, коргьой гьонунсуьзе алвере сохдем. Эже бирит, чув сохдейт э зиндегуни?

Дибие: Иму имогьой совод вегуьрдейм диеш эже совод эрии вегирде заочно хунде. Э кориш дерим вокурденим хубе дузе рэхгьо э шегьер. Гьисди имуре хэгьергилиош, э вэгИдою гIэруьсиш мисохим. Туь чутьтами?

Бен: Девлет бири мере. Рази эз Худо, оммо дуьл динж нисди, эдее тенги кешире. Эри чьуни бу и кор?

Герц: Туь ошугь бирей. Гьелбетте дуьл жогьобе муьгьбет воисде. Те туь духдере нихои эри туь, динж нимуни. Кини и гуьзел, нигуи э иму?

Бен: Нум ю Туьруьнжи. Балай ю балай марале хунои, чумгьою дуь жовоици, белки ишму уре шинохденит?

Дибие: Эри, шинохденим. Обурлуье духдери, уре гьэйри сохде келе гIовуни, гьечуь у динжи, рэхьмедуьли, саламети. Евош бош Бен, гьэлет месох.

Бен: Э жун Худо зобуни е тильтеш нисохум э у марал догьи. Туь нисе дире бегем гьовой мере? Мивиним екире имогьой э гьер куьне руз дусдире тозе мисохим.

Герц: Э сер дуь чум ме.

Дибие: Эз дуьлимеш гьисди и гофтуь.

Сеимуьн перде

Утогъ Бени. Бен нуьшди э куьрси э пушой гиргинее шилхьон.
Сер ю э шилхьони, лап лугьонд хисири. Дироморенуьт 3 расде
фолчигьо. Вежегьесденуьт э иловлей шилхьон, хунденуьт гьерки
э нубот хуьшде мэгӀни:

Темизи:

Э десгьо-пойгьо хьовир,
Дуьлтуй биё бу темиз,
Ниетгьоре месох вир
Месох ёртуьре гӀожиз.
Чуьни суьрх? Тикей гьову
Чуьни пул? Тикей когьоз
Гисне бире ниведову
Одоми, не хуру сиб е гьоз.

Дуьруьсди:

Хэлгэ сох бирор хьурмет
Десе ди э косибгьош
Келегед тэгьиемет
Бисдо инсон – нибу хош.
Биё сохи туь зэхьмет
Э тойгьой туь тен-бе-тен
Гьемме мигую рэхьмет
Э хурде ширтуь раче Бен.

Гуьзели:

Туьре лап хосди Туьруьнж
Оммо нисе бирмунде
Согэ руз нуьшди э куьнж
Эри бологьойтуь гирисде
Воку кугьне парталгьо
Бош очугь гьевелине
Э ёр биёр рафдигьо салгьо
Туь инсони э сегьне

Э товушевоз фолчигъо вирихденуът.
Бен хэбер бирени. Гъовой ю дегиши.

Бен: Гьеммере гъезечуъ мисохум эзимбэгъдо те песини руз.

Векендени Гюшире энгуышдерире эз дес, шендени э пенжере, ведаредфени эз хуне. Вогошдени шохьонгум. Э хуне дери Мелке.

Мелке: Э чуй хьол дери туъ, куклейме? Ме эхи жуър-бежур-ре гофгъо шиновусдем.

Бен: Рафдем эки Келе Нумаз эже Гюнигъо кура биренуът. Гьемме суърхгъо-пулгъоймуре бэхширем э косибгъо. У мурдале девлети, э шефтиревоз гъэзенж сохдем. Вокурдем куыгъне, оммо э хъэрекеттуъревоз темизе парталгъо, рафдем эки Туърунж. Э гужевоз, э хоширевоз дуз бирем э кифлетюревоз, чуьнки угъоре хуб шинохденуът. У гириди чуьнки ченд сал э ме денишири. Себэхъ эдей ведироморенуъм э корхоне, гьеммере эз сер бошден сер мигируъм. Кумеки мисохум дуъруьсл, темиз э туъ Гъэзизе деде. Туъ омбар ветовусдей эз хэре коргъойме.

Мелке: Эз меш шоре одоми нисди имогъой э дуьнегъ, бовор сохденуъм э гоф туъ, чуьтам э гоф Худо боворини.

Дироморенуът Туъруьнж, Герц, Дибие – гьеммеэки хунденуът мэгъни:

Рафде э раче асму
Келе сие думон
Шор бирейм иму
Ведироморе эз и зиндон
Тевесер зие Туъруьнж ве Бен
Эришу дуьгу товуш чуьшме
Зиндегуни мибу гуйге чеменд
Мэгъни михуним туъ не ме.

П е р д е .

Д О В Г Ё Й К И Ф Л Е Т И

Пьеса эз се се перде э пестеинеревоз

Возирегорьгьо:

Шолум – колхозник

Гуъли – зению

Пинхас – кук ишу

Алхаз – заведующий эн омбор шороби

Марго – духдер ишу

Ирмигьо – чойчи

Салман – милиционер

Серфит – дедей эн Гуъли

Сутьфдеи перде.

Хуней эн Шолуми. Гуъли нуъшди э кресло, эдее журуб бофде. Э зерверсерию сэгІэти. Сес эн сэгІэт оморенге, Гуъли сер гирдени эри гоф сохде.

Гуъли: СэгІэт шеш эдее бире. Шев-нимешеви, оммо жегьендемие шуъвер элемиш веди нисди. Кидан, эжеиге. Дануъсденуъм, оморенге: "Эле, чендгъэде кор мисоху е одоми. Хасде бисдорумки". Эле, гьеммею дургуни. Э бист сал иму зе ве шуъвер биреймо, е расте гофле не шиновусдем ме эз у гьелем. Кидан, э песой чуй кор, лутьие гьуллугьой хуъшде рафдиге. Эже мибугеш ме хуъшдениме хуб дануъсденуъм – эри хурдегьо, гешдегьо. *(Сохдени эз*

зугьун Шолум): "Бегьем хэсде бисдорумки, е минутлеш е согъэ руз не нуьшдем. Мимунд бегем те имогъош колхоз иму, чуй ме-нигъо нуьгъ-дегъ доне семе нибисдоге."

Дие Гуьли гоф нисе гуфдире. Эз у лойгей дер оморенуьт, ве-ди биренуьт Шолум ве Алхаз. Поисдет эки дер, эдее гоф сохде-нуьт. Гуьлире эз угъо гъич хэбериш нисди.

Шолум: Гуйге э гъэземет эдее фирсоренуьт мере. Поиш нисе рафде.

Алхаз: (*Э руьхшендиревоз*): Ме эхи нисе варасиренуьм и гоф-туьре. Бегем эри одоми хунею гъич э жигей гъэземет бирени?

Шолум: Туь эз коминжо, эз коми логъ гоф сохде? Ижире бе-де зен туьреш мибисдоге, лап хуб миварасири туь гофгъоймере, э кес руьхшендиш ни сохди. Езугъ нисди э чуьмени мерд? Э и зо-монгъо чуькле гІэилгъойш дануьсденуьт, ки бире сэхьиб эн хуне – гІожизе мерд енебуге беде зен. Оммо мере екем чуьниге тешне бири – туь мере шиновусдени? Бебейтуь муно гъич тоб дореш ни-се дануьсденуьм.

Алхаз: Ме и жире гофтуьре гъемише шиновусдеш мишино-вум, хуб варасиреш миварасуьм, э туьревоз э ижире игърол эри садсалиш разинуьм. Кеш дие зуте э омбор колхоза, ме хубе шоро-биш пэхъни сохдем эри гьердуйму, хуьшге жэгІиш гъисди мере.

Шолум: Эри энупусире омбор шоробитуй мэхьтел бирем мунде ме бегем? Мехэндуйн мере, хуьшденитуйреш э неогъие го-февоз биёбур месох. Мигуфдириге, бие бурайм э ресторан, гофи-ге мибисдо. Белки рафдеш мирафдуймге э туьревоз, туь хубе жи-ро михосдиге эз ме.

Алхаз: Ресторан эри чуьни туьре? Мере гъисдигъо сие шороб э сад ресторан миверзуь. Хурдиге эзу шороб ей пейле, эзечи ми-дани, гуйге тозеден эз деде бирей, енебуге э е гІуьломиге гирош-дей.

Шолум: Э у гІуьлом дуьшмегъойтуь гироро. Бошку, мегу дие, неогъие силис несохим. Гоф мердире бие сохим гьердуйму. Хар мебош, лап хосденуьм эз туь. (*Э ниетевоз*). Гоф хурде ве

гъенжире нисди. Зобуне шоробиш доге туьре э ресторан, е сес эни гоф "ресторан" миверзуйки э гъеммей шоробгъо э омбортуь деригъо. У лап келе культуреи. Ту, эйме эзечуь оморени, чуьниге гоф "культура" нисе варасире. Туьре э ресторан дорени жиге, эже дуьлтуьре воисдге, хьэз омоге. Гирдени туьре э ресторан э жигей падшогъ. Чуь воисдени, вих эри хурде, эри кейф сохдейтуь. Музикиш туьре воисдге, е семонети мишени эри зерегорчигъо, эритуь жир-бежире гъовогъо ве мэгIнигъо мизенуь, михуну.

Шолум поисдени, чумгъоюш те ниме сэхди, жендеке э е жиге жумундени, гуйге эдее вежеисде. Бироргилию денишири эу лап иронически. Э гъэд хуне сес эн телефон зенг зере эдее оmore. Гуьли оморени эки телефон куьнд эри жогъоб доре.

Гуьли: Руз туь эхэйрбу, дедей. Чуь сохде? Дур гердо, гисне не мундей? Ме э хуне тэхъноюм. Жегъендемии шуьверме те имогъоиш эз гешдегъой хуьшде не омори, меш дуьлпесоюм эхи. Кидан, эжеиге, бегем у э и иму зигъисденимгъо салгъо э ме е дуге гоф семе гуфдири? Гьерчуь бисдо шиновусдиге э сереботию, эри ме зенг мисохи. Чуьтам гIоси небошум э ужире бедхъисобе коргъоюревоз? Эхи эз хурде ве гешде бэгъэй уре дие ечиш нисе воисде э гIуьлом. Ечиш нибу, ме эри эну е хубе кор мисохум, биебуриш мибу эз десме э гIэрей эн хэлгъ-жэгIмет иму. Бошку, дедей, туь гIосиш, гъэйриш мебош эз ме, э коргъой эн кифлет мешет мебош.

Норени э гъэгъревоз трубкаре. Дарафдени э дорну хуне, ведиш нисе бире. Э у лой дер хьэрмэхъгъо эгене э мэслэхъэт деруьт.

Алхаз: Туь лап модни одоми бире-бебей. Ме и хосиет-гъойтуьре суьфдеден эдем дирe. Ше у небирение ниетгъоре. Ебо туьре унгъэдер пулиш нисди. Дубореминжи, зентуь туьре гъич

миилуь рафде э у "культурни" жиге, э у "современни" жиге рэхь-эти вегирде?

Шолум: Эз зе ки пуьрсире? Песде у дануьсдеш эзже мида-нуь? Белки туь хэбербери мисохи, куьгьне дусдтуьре мифурухи. О, бирорме, мере лап воисдени е гиле семе эз дули э ресторан гешде, кейф вегирде, е хэйли пулиш шенде, хэржи сохде. Чутьтам иму фурмуним зере? Э хуне, расди, пул дери. И перигьо согь эриме ечиш не гьишде, овордум, дорум э Гуьли гьемме пуле, чэндгэдер гьэзенж сохде дануьсдемге э кор. Эри дегь гиле э ресторан рафде вес мисохд у пул. Туь бигьо кумеки сохи э ме, жегьндемие зенмере эри фурмунде. НэгI, божехьэт, эрчуь бисто ведиров. Туь чуь гуфдире, зенме и зенгьой хэлгьэ хуно харле мибистоге, дердигьой ме чуь бу. У эхи бегьеме садани, уре эри фурмунде сад профессор гереки.

Алхаз: Туь эз профессор кеми бегем? Ой, фэгьир!

Шолум (*етте гьэйрире бире хуно*): Туь эгене руьхшенди сохде?

Алхаз: Хэсбошолум! Э туьчуни дананде ки мидануь хандуьсте?

Шолум (*э хуьршевоз*): Туь мере хар хьисоб сохдениге, дие чуьжире хьэрмэхь мибу мере эз туь?

Алхаз: Бошку, э туьревоз мэхсереш сохде нисе бире эхи. Гу гофтуьре, туь те имогьой бие хуб дани, ме э туьревоз гьемише рази мибошум, эже гуфдиригеш мирайм эеки. Лап эзу садане зентуьш нитерсуьм. (*Э у лойге*). Худо мееро, у гофмере шиновусдге, песде коргьойме варасди, омун эн Гуьли киреи. (*Сэхд*) Гьич ме эз зен нэгI-о, эз е беде мердиш терсирем, дузире гу, туь мунош? Эз ме олхоин бош!

Шолум: Хуби. Весси. Имогьой эдем дире, туь лап бегьеме хьэрмэхьи. Гуш вени э инжо. Туь мирай э хуне, партале дегиш мисохи. Мивокуни сие кастумеш, сипре шеиш, галстукиш егьин э герден бие вебу, э пой миовокуни модни туфлигьо э тенге, дуразе винилеревоз. Песде мией экиме. Дуз мидирой э хуне. Ме те туь оморе зере хар мисохум мидейлуьм. Оммо дениш, у эз туь

гьерчуй бисдо пуьрсиге, зиедие гоф месох, токи жогьоб миди э гьемме гофгьойю эри-эри, ненге иму э вихьтей Гуьли ни ведиройм. Варасири? Бура!

Алхаз сере жумунде-жумунде рафдени. Шолум диреморени э хуне. Сес вокурде омorigьo дере шиновусденге, Гуьли ведироморени эз дорну хуне. Эдей вокурде герме жакет. Шуьвере диренге, поисдени э жигей хуьшде .

Шолум: Хэйр гердо, ой, зе. Туь имэхьэли эже рафде? Белки туьре тозе ошне бири, белки туь эз ме визор оморей?

Гуьли: Эле, дургуне зугьун эни пуче мерд бура гердо эи зуригьo. Бегем туьре элем гьинориш гьисди э меревоз э бэхьс, э хуьужет эри дироморе? Шев-нимешев э хуне коми жегьендемие шуьвер оморе. Ме гьечуй дануьсдуьм туь эхирки э зир мошин офдорей-дарафдей не ведиреморорени, е ненге туьре э кордеревоз гьучигьo зери-куьшде, мере, и езугьэ серлеймере эз есири зентуь бирей хилос сохдет. У кор мибисдоге, дердигьойме чуй бу, екем ширини эз туь чуйни шуьвер хэвлет бирейре мидануьсдуьм.

Шолум: Пой е мунут. Туь вэгIдо эри жогьоб дореш нисе ишдеки...

Гуьли: Э гофгьойтуь ки бовор мисоху. Ебо гьеммейтуь дургуни. Бегем ме туьре ченд бо э дургуни не гирдем?

Шолум: НэгI, имогьой ме эдем дегиш бире. Туь мере, чутам имогьой хэлгь гуфдирениге, перевоспитать сохдей.

Гуьли: Тозе гофиш офдени гьемише. Э туь беде зе миесд офдоре э жигейме, песе туь гьэдуьр чуймени одомире мидануьсди. Бошку, гу гоф туьре.

Шолум: Гьемишеинере хуно, зу себэхьмунде э кор рафдуьм. Эри бегеьм нефес кешире мере гьич минкин небисто э согьэ руз.

Гуьли: Эле, и куьгьне гофлегьойтьуники. Э сереботи жофой игидитуь ме лап омбар эз и хэлгь шегьериму шиновусдем. Еки мугу: Шолум имбуруз нимей руз кори э зир эн дор гьэйсии хи-сири домунде. Э пушой коре варасте, э хуне рафде иму уре э

гужевоз хэбер сохдим. Унигейгегьош диеш э гІэтош ругъэ декирдуйт: Ужире тембеле гьелем хори недири.

Шолум: Туь э гофгьой кес бовор сохдени, э гофме нэгІ. Дие чуй мундебу эри фэгьире серме, зен чуймени жофолуье мердиш эзечуй, эз кес зобу бие бу э меревоз. Эй, хэре зе, угьо – зобуне зугьунгьо, эз бэхили лов сохденуьт ужире дургуне сесгьо, ме не туьни дуй э зеки жейле бошим гуфдире. Туь бегем нисе дануьсде, мере эхир эни мегь эдее орден доре эри жофой игиди. Туь шиновусди: орден. Эзечуй э хэлгьиш мигуи.

Гуьли: Туьре орден дорениге, угьониге гьемме, лап тембелгьош, игидой жофо бие бу ки.

Шолум: Чуйтам гуьом э туь дие, туь эме эгенеш бовор нисе сохде ечи. Эз Алхаз мипуьрси, У экиму эдее оmore шохьонгум.

Гуьли: Куьгьне хьэрмэхьтуь. Уш эз туь нидемуну дие, уш туьре хуно пуче люти, хэре пиенискеи дие. Эзу зиьдте бироргили ниофи ту.

Шолум: Кини пиениске? Алхаз? Уре хуно миесд бире гьеммей мердгьой эн шегьер иму. Туь чуй гуфдире. Бегем э туь екиш не гуфдири, Алхазе хэлгь эдее вихде, норе э жигей куьгьне председатель колхоз иму?

Гуьли: *(гуйге э хуьшдеревоз)* Ингэдер дургу э ме бедхьисобе шуьвермеш нигую-о! Белки дузи гьеммей эни хэбергьою?

Шолум *(дирени, зен ю эдее бовор сохде, гуфдирени диеш сэхд):* Имогьой туьш мидани, чуйжире суьрхине шуьвер офдориге э туь. Ой, зе, туь лап мозоллу бирей эз деде. Коргьой эн кукимуш хуби.

Гуьли: Эле, дие эри чуй нисе гуфдире. Когьоз омори эз Пинхас?

Шолум: НэгІ, когьоз не омorigеш, туь дануьсдени, у эз институт эз е-дуй рузиге э каникулгьо биьв. Оммо имбуруз ме е хэйли гоф сохдем э келеи энуревоз, э профессоровоз.

Гуьли: Туь чуй гуфдире...

Шолум: Эз туь лап разини, чуйнки эз сифот ве буй-бала у э туь ухшеше зере, зурбо рачи доре омори куктуьре.

Гуьли: Пой-о! У мере кей дири, эри ужире гоф сохде экитуй?

Шолум: *(Екем домунде э хуьшде):* НэгI, ме гуфдирем э у... Мугу, эгъуьлмендиш гьисди куктуь, эз сифотиш рач веде бире. Песде ме мугум, гуйге сирот эн зенмени. Уш гуфди: Зенишму эу рачи кук ю гьисдиге, зиедте герекиш нисди.

Гуьли: Песде эйчуь огол не зери уре э хунейму, гъуногъ-лугъи семе мисохдим уре э хотур куклейму.

Шолум: Туь чуь хунде, огол низенуь? Оммо у жогъоб до: Имишев эриме келегъой эн шегъер банкет сохденинуьт, воисдени мере мивини э у вэхд э ресторан. Екем минуьшим, меслэхъэт мисохим э сереботи зиндегуни.

Гуьли: Зиндегуни эйчуьни ишмуре? Эз товней хундеи Пинхаслейме гоф сох. ГЭиле неогъ э сер дорд доренигъо киниггъоревоз инжимиш несоху.

Шолум: Имогъой гьемме жире гофгъо бигъо соху дие, нуьш-деки э ижире келе високообразованни одомиревоз.

Гуьли: Эй-вой, серме эдее черх зере. Ме гьесэIэт гиже хуно-юм. Э и руз биригъо мере шори, ме эз туь э бист салиш не дирем... Эле ме чуь хунденуьм. Туьре пулиш кидан нисдиге. Гу, зу бош, ченгъэдер герекиге. Кем токи небу, ужире одомире бегъем гъуногъ сохде бегем зарафети, уре иму э хотур кукиму э жигей падшогъ бие гирим. Гу зу, пенжо монет весси?

Шолум *(э тэхъдиревоз)* Гьелбетте веси, омбариш гьисди. *(Песде екем пейму бирере хуно).* Кемиш бисдоге, чуьтам вегинуьм эз туь унгъэдер пуле, у эхи эри гъуллугъгъой хуне гереки.

Гуьли: И чуь гофгъой туь гуфдирени? Пул эз е логъ оморени, эз е лойге хэржи бире, глов не чой рихденигъоре хуно *(Вегирдени э дес кошелек).* Ини хьофдот монет, гьимиш месох, ненге эз хэлгъиш гIэйби, мигую, эри теке куклеймуш зиедие терсиреним хэржи сохде...

Шолум: Имогъой, эз имбэгъдо гьижире гоф екиш эз лэгIэ ниведешенуь *(пэхъни сохдени пуле э куьф).* Дуьлпесо мебош, хьисоб сох эри туь, ме имишев и пуле э жигей хок мишенуьм э ресторан. У куьгъне метлеб мени.

Гуьли: Чуьни куьгъне метлеб туь, ме ахи не варасируьм?

Шолум: *(Э хуьшде дироморе одомире хуно, екем э терсезов):* Келе метлебмени э келеи эн кукевоз екем нуьшде, суьгъбет сохде.

Гуьли: А-а-а! Гьербегьел эзечуь гу дие.

Дироморени Алхаз.

Гуьли *(э шорирезов):* О, Алхаз! Чуь хубчи туь оморей. Эз кукме шоре хэбер оворди е келе, хуьрметлуье мерд хуькуьмети, профессор, юре хунденигьо, тербие доренигьо. Шолум э туь гуфдири?

Алхаз *(евошлей, тэглди не сохде, мугьоем бирере хуно):* Эри.

Гуьли: Чуьтам гуфдири? Эри? Ха-ха-ха, туь хубе зарафетчини, бегьем луьтие одомини! Кей миест гуфьдире Шолум э туь и гофе, ечи у гьейсэгIэт, эз кор оморенге вохурди э у одоми. Туь мэхсере сохде?

Алхаз: Эри.

Гуьли: Туь эхи геймиши. Бегем туь эдее домор бире? Иричке, хэгергилимере толोगь доре, тозе зере э хуне оворде?

Алхаз: Эри.

Гуьли: Элле, веси, лап эзечуь мехэндун мере, ненге гьейсэгIэт эз хэнде суьст мибошум миофдонум... Туь бегем зугьун бебегьоре фурмуш сохдей, эз эри бэгъэй э ёртуь дие гоф не домунди?

Алхаз: Эри.

Гуьли *(Тоб не доре, сэхд, эз гьеммей дуьл хуьшде хэндуйсдени, гофиш э гужезов ведироморе эз лэглэю):* Элле, веси, минет эдем сохде, дие мехэндуйн мере, ненге шугьэммеш эдее эз гуж хэнде дорд доре. Э туь гIэтош ве, туь кефсуьзи?

Алхаз: Эри.

Гуьли: Чуь бири ире? Мере э хэндеревоз микуьшуь имбуруз. Ой, Шолум, туь семе гу э хьэрмэхьтуь гьерчуь бисдо, поюн уре, туьре неогъи муьрдейме нисе воисдеге.

Шолум: У имбуруз эз шори пиёни, ме э туь бегем не гуфди-рем, уре эдей э жигей председатель колхоз эниму норе? Песде у руз пишнеи е кило морожни хурди. Бугъозию кидан эдей дорд доре.

Гуьли: Эле, ме совсим фурмуш сохдем. Амбарак бу, Алхаз, и кор бегем биренге, туь бие е хубе компания сохи.

Алхаз: Чутьтам? *(Дениширени э лой Шолум, гуфдирени зури-зури):* Эри.

Шолум: Бошку, э зе, варас бура и силисе. Туь имуре дие неогъ медеил э инжо. У мерд, профессор, Худо мебурро, гуфдиренигъо миденишуь мипою э иму, гІэйби.

Гуьли: Бурайт-бурайт, Алхазиш биевгу э туьревоз, кумеки соху э туь, у эз туь амбарте дануьсде раче жирогъо гофсохдере, екем э мерде зарафетгъой хуьшдеревоз михэндуьнуь... Туь, Алхаз, компресс спирти бие вени песде э бугъоз. Екем эрегъиш хурдиге э ресторан, эри туь кумеки мибу. Михури? Екем заралиш бисдоге э нехой жунтуь, э хотур кукиму эз дуьли сугъбет сох э у профессоровоз...

Алхаз: Эри, коми хар нихуру...

Шолум буррани гоф юре, эз гъул ю гирде, ведироморенуьт э куче. Гуьли э шоре сифотевоз нуьшдени эгене эри бофде. Э песой дер.

Шолум: Туь бегем чешмиш бирей? Чуь хундебири туь? Екемлей мундебу эри зенме биней эни коре варасире, метлебгъоймуре дануьсде.

Алхаз: Туь гъишдей мере дие. Бегем туь не гуфдири э гъем-мей гофгъой эн зентуь э е гофлеревоз "эри" жогъоб доре?

Шолум: Песини гофгъоре чутьтам ведешенди эз лэгэйтуй, э лэгІэйтуй эрегъи ве шороб дараво согъ гІуьмуьртуь.

Алахаз: Ебореминжи, ки тоб мидуь э жигейме, эз ю гуфдиге эрегъи ху. Дуьминжи ме гъогъ бисдорум мунд, зентуьре гъезечуь диренге. Туь чутьтам дануьсдей уре фурмунде: Бовориш не сох-

дум э чумгьо ве гушгьойме. У Гуьлини эз ме гуфдиригьо: Эрэгьи ху!

Шолум (Э келегедиревоз): Туь мугу ме э вихтей зенме ведироморе нидануьм. Имогьой офдо э пушо, имуре вэгдо нисди. Э рэхь гьеммере ихдилот мисохум. Туь э меревои. Эз екиш метерс.

Рафденуьт. Э гьэд хуне Гуьли эгене шендени бофдере. Ведироморени э пушой сегьне. Дениширени э томошечигьо э ниетевоз.

Гуьли: Э ме е фолчи э салгьой гЭилиме бурмунди, чужире гьисмет биренини мере. Суьфдеден гуфдиребу у – шуьвертуь туьре лап инжимиш мисоху. Оммо миёв е руз у пиёнискеире ве гешдеире мишенуь, туьреш, гЭилтуьреш мозоллу мисоху. Имбуруз эдем дире: лап дуз ведиромори у гофгьой эн пире фолчи. Ижире шори мере гьич не бири. Мере гьейсэгЭт воисдени эз дорун дуьлме хэндуйсде, шори сохде. Мидануьсдумге, мэгниш михундум. Оммо Шолум эи зуригьо нивогошду. Эки гуьом шори-мере, эхи дуьлме э тэхьной эдее пара бире, эзечуь пури у эзи келе мозол, коргьой азизе кукме хуб биреи. Огол мизенуьм хэгьбергилмере, Иричкере, биёвгу екем нуьшуьгу эки ме , эз шориме екем э ю расуь.

Гуьли вегирдени телефонни трубкаре.

Гуьли: Иричке, туьни? Чуь сохде? Э Алхаз дениширей? У имишев э хуне дир миёв, э Шолумевоз э еки э герекие гуьллуьг фуьрсорем уре. Веги Маргоре, биейт нуьшим, е пейле чой хурим, суьгьбет сохим. Мере шоре хэбергьой, э тэхьной гьэрол гирде нисе дануьсденуьм. Бошку, дениширем э ишму.

Оморени сес дере куфде.

Гуьли: Эй, кини у? Диройт, вокурдеи.

Дироморени Серфит.

Гуъли: Чув хуб бисдо, туь омори, дедей. Гирор нуьш, е пейле чой ху э меревоз. (*Норени пейлегторе, овурдени чойникеш. Нуьшдуьт*).

Серфит: Гьелеш нисе омори э хуне нелоиггэ шуьвертуь? Ме гьемише не гуфдтирем эз туь, эзу келей хуне, бегьеме сэхьиб зритуь ве гІэилгьойтуь нибу? Бедмозол сохди туьреш, мереш э туьревоз. Ме ченд бо не гуфдирем э туь, небу бурай э у э шуьвер, ники нивиним эзу, зугьунмеш эз хьэрой вомундебу. Суьрхине домор бу туьре, юш келе одоми: икспидитор-туваровед.

Оммо туь тэгІэле хуно е гофе гирдебири мунде (*сохдени эз зугьун духдер ю*): нэгІ-о, ме эз Шолум бэггэй екиреш нисе хосденуьм. Туьре мозол биреиме нисе воисденге, э тэхьной мимунум, оммо эз у бэггэй ме екиреш нисе хосденуьм.

Гуъли: Туь неогьире гофгьоре ше, дедей. Ме имбуруз лап гьэдерсуьз мозоллунуьм, у мозоле мере Шолум дори.

Серфит: Элле, и харе духдерме чув хунде? Туь нимсэгІэт пушо бегем нифри не сохдей уре э телефон? Чув келе дегиши бири э зиндегуни туь енебуге гьовой соггэ одоми эзечуь, чувтам дор эз зарб эн кулок, биё гьелбегьел дегиш бу, сипире э сие чарундере хуно.

Гуъли: ГьейсэгІэт Иричке хэгьергилиме, зен Алхаз, мидиров, эри гьердуьшму очугь мисохум е энтиггэе хэбере. Ини угош.

Дироморени Иричке э Маргоревоз .

Иричке: Шохьонгум ишму э хэйрбу. Хoley Серфит, хьолтуь чувтами, ме туьре хэйли мэхьэл не дирем.

Серфит: Гьемме хуби, духдерме. Э Гуъли, дуьлме лов бисдо ахи, гу бура, чув тозе кор омори э сертуь? Мере диеш дуьлпесо месох!

Гуъли: Бошку, нуьшит гьемме гІээзизе гьуноггьо. Чой хурде-хурде, хуб гуш венит мере. Элле, Иричке, эз ёрме ведараф-

дебуки – амбарек бу, шуьвертуь эдее келе одоми бире. Дие ишму куьгъне дусдиреш, кидан, хьисоб нигирит, э имуревоз оморе-раф-деш ни сохит.

Иричке (*мэхьтел бире*): Ме ечиш нисе дануьсденуьм, хэйр гердо.

Гуьли: Элле, Алхазлейтуь лап гIэйбкешки-ки, э туьш бегем не гуфдири, шоре хэбер не дори? Гьечуьниге шиновит: у эдее председатель колхоз бире...

Иричке: Нибугьо кори-о. Ки мидуь уре ижире гурунде кор, ки э ю бовор мисоху? Туь эме руьхшенди сохде? Хэлгъэ семе механдун!

Гуьли: НэгI, ме дуз гуфдиренуьм, егъиниш дануьсденуьм. Эме Шолум овурди и шоре хэбере.

Иричке: Туьш бовор сохдей рафде. Бегем туь имбуруз эз деде бирей, зарафет энуре не варасирей?

Гуьли: Э жун дедейме, у зарафатсуьз гоф сохди э меревоз.

Серфит: Э нумме шовгIо сохдейге, дургу нисди, гьеме расде гофи.

Гуьли: Элем ме гьеммере не гуфдирем э ишму. Шолумлей-мере эри жофой игиди эдее орден доре.

Серфит: Ме гьемише гуфдирем э туь, Шолум хубе мерди. Уре хуно миесд бире гьемме доморгьой эн хосдогоргьойме. Ченд-гъэдер гиришем ме тейте туьре э шуьвер доре, сабуриш вес сохд ки мере э туьре э хьижет эн кор ишму зе ве шуьвер бирей гужевоз э гофме денишире.

Гуьли: Туь те имогьой не гуфдирей эхи и гофе. Имогьой хьуькуьмет гъэдуьр эн шуьвермере дануьсденге, туьш тэгIриф доре уре?

Серфит: Ме э сереботи азизе Шолум гьич бегем зобуни гуфдирем? Эз ю зобуни диреш не дирем, ме муном эз у расди.

Гуьли: Бошку, э ер туь немунди. Э и руз гьемме гьэйргьойме гирошди, сур-сургум бире. Эз Шолум рази биренге, ме эз согъэ гIуьлом разинуьм. Имбуруз мигIидмени, софое руз дуьлмени, ишмуш э меревоз шор бошит.

Иричке: Алхаз э шуьвертуьревоз эже рафди, негуи? Чув келе гьуллугь бири угьоре э имуш негуи, хэгьерлейме?

Гуьли: Эле, эз ёрме- ведироморики. Ишму не дануьсде нибошит, себэхь куклейме эдее э каникулгьо оморе э хуне.

Марго: Э холей Гули, эз Пинзас когьоз омори?... *(Гуфдире негьэбереки эз хуьшде и гофе, Марго гирдени э десевоз ловгьой хуьшдере).*

Гуьли: Эри, гНэилме. Себэхь мивадарайм э пушорэхьию.

Иричке: Туь эхи эдембири гуфдире шуьвергьойму эже рафдиге...

Гуьли *(э келегедиревоз):* Эз Пинхас хунденигьо жиге э шегьериму келе одоми омори, профессор. У Пинхасе лап тэгГриф дореду, э Шолумевоз шинох биренге. Гьердутьшуьре фирсорем эри у профессоре э ресторан хуб гьуногь сохде. У гуфдири эз Шолум: куктуь эз гьемме хуб хунде, рачиш гьисди, кидан э зентуь ухшеш зере. Ужире гНэил бирей келе мозоли эри бебедеде.

Иричке: Туьш бовор сохди? Не фурмунди угьо туьре?

Гуьли: Туь чуьни, э ижире коревоз коми хэр зарафет мисоху. Гьемме дузи, Гьич е минжигьлее шеклеш меевгу э дуьлтуь.

Иричке *(э хуьшде домундере хуно):* Э белки...

Эз куче оморени сес эн хьэрой-хьэрой, песде сес мэгГни:

И шоробе ширини
Ки дори, азизе дусд?
Не нуьшдейм э серини,
Эз чуьшме сухдигеш пуст.
Ки эз ширине онгур
Эри хэлгь сохди шороб,
Мепой эз шориму дур,
Бигьо: пур-пурини гьоб.
Колхозчи, колхозчи
Пуре пичинке дечи.
Ай-ай-ай-ай-ай...

Гуъли: Шиновусдени, Иричке, сесгьой эг гъэйгусуъзе лутьигьой шегъере? Оммо шуъвергьой иму дие э у харе коргьо недеруът.

Иричке: Э белки... э белки...

Гуъли: Ше у терсгьоре. Лап дегиш, е жиройге бирет гьердуй, лап э рестораниш гьуллугъсуъз нисе рафденуът. Ме угьоре э гужевоз фуърсорем э унжо, омбар минетиш сохдем.

Иричке: Эз лэгГэйтуъ Худо шиново...

Дер эн хуне вокурде оmore. Милиционер Салман ве Алхаз эдее диrowунденуът Шолуме, эз гьулгьойо гирденуът, неофденуът.

Салман: Гуъли э инжо зигьисде? Овурдем шуъвертуъре.

Гуъли: Эле, фэгъире шуъверлейме суъст бири. Шолумле, чуъйтуъ дорд доре? Гу бура э зенлейтуъ, метерсуън мере, дуълмере пара месох, гьейсэгГэт миофдонум мимуъруъм эз хъэлежигери, эз дуълпесои.

Салман: Дие ижире нечогъи бисдоге, чорейме нибу, "скорый помощь" огол мизенуъм уре эри э хуъшде овурде. Денишит-о!

Милиционер дорени честь, ведироморени.

Гуъли: Чуътам не денишируъм ме те имогьой э туъ бегъем, чуътам зе э суърхине шуъвер ю бие денишуъ. Эз имбурузевоз лап хуб мисохум туъре, духдириш герек нисди имуре. Туъ э ме негуи, Алхаз, чуъ сохдей э хъэрмэхьтуъревоз?

Алхаз (*хундени*): Колхозчи, колхозчи,

Пуре пичинке дечи...

Шолум (*э уревоз эеки*): ай-ай-ай-ай-ай...

Гуъли: Эле, вой эриме. Эгене дорд до уре. Чуъ бири фэгъире шуъвермере? Эле, эдее муърде бедмозоле мерд, э чуъмени харевоз, пуче чиревоз соймиш биригьо. Мереш эдее шенде, эз ордениш пес мимуну...

Алхаз (*зугьун ю пелтек бире*): Метерс, Гуъли, э меревоз у гьемише мимуну. Э хотур орден вегирдеиш е хэйли михурим, кейф мисохим.

Иричке: Туь эз пиёни бегъем гофиш сохде нисе дануьсдеки. ГТэйб шермендеи э пушой холей Серфитиш. Марго, вэхи, зу бурайм э хуне.

Марго: Паочка, куш э хуне, амбар хосденуьм эз туь, мисох имуре дие инжимиш, месох имуре биебур.

Иричке, Алхаз ве Марго рафденуьт.

Серфит: Ме гъемише не гуфдирем, духдерме, и герексуьзе нелоигъ эйтуь хубе шуьвер, сэхьиб хуне нибу гуфдире?

Гуьли: Туь чуй хунде, дедей? Ужире бедмозоли э Шолумевоз э герекие кор бири. У гъисди, туь унгэдер нидани, "производственная травма". Туь нисе дануьсде, чуьтам келе одомигъо, профессоргъо шороб хурденуьт. Угъо гъемме эни хэлгэз хуно э рюмкелеревоз нисе хурденут. Угъо келе бире-бире, пейлегъошуш келе бире. Шолум э ужире гъэдер ичку нисе ветовусде. У ахи гъелем чуькле одомини. Орден вегирденге, дегиш мибу.

Серфит: Эле, Гуьли, туьни? Туьре шуьвертуь лап э дес дешендики. Дегиш бирей туь эз себэхмундеиревоз. Нечогъи эн шуьвертуь ведини, оммо туь чуй нечогъи бирейге ме нисе вара-сиренуьм. Песде туьре орден энэ эри чуьни? НэгI, ме дие э инжо нипоюм, бурам э динже хунелейме, ненге э и диренуьмгъо коргъо тоб доре, гъэрол доре нидануьм.

Серфит рафдени. Гуьли нуьшуьндени Шолуме э кресло. Гъово гирдени сер юре, е пейле гIовиш декирдени э сер шуьвер.

Шолум (*чумгъоре нисе вокурде гъеле*): Профессор, ме миром эйтуь, ху э имуревоз, ненге зен ме мере эз хуне миведекинуь.

Гуьли: Эле, и чуй гуфдире? Ме дануьсдемки дузитуьре. Туь эри азизе куклейтуь сере норей, и азизе жунтуьреш гъимиш не сохдей. Э екиш бовор нисохум эз туь бэгъэй. Куктуь себэхь миёв, гъозор бо эз туь согъбоши мигую.

Шолум: Профессор, эжеи туь, эже вир бирей, ме туьре нисе диренуьм ахи...

Шолум сэхд гирисдени. Гуълиш э уревоз э еки, диеш сэхд.

Дуьимуьн перде

Алхаз ве Шолум ведиромореньут э пушой сегъне.

Шолум: Чуть коргьо омори э серме, бирор? Э хэпермеш не бисдо ечиш, кук ме э каникулгьо оморей терсуьнде, хэлегигер нисохдге мере.

Алхаз: Чутьтам эхи? Бегем туь эз оморей балай туь шор нибоши? Ечи хэйли мэхьэл екире не дирейт. Кидан у те имогьой келе мердгьош бириге, бурайм э еки, меш уре хош оморей сохум.

Шолум: Туь хэри енебуге гьэриш? Шовуне э ёртуь не мунди? (*Келе ох эз биней дуьл кеширени, сереш жуьмундени*). Себэхь-мунде эз хов хэбер биренге, е согъэ сэгIэт дегешдем э хьэлов, дие ховиш не омори мере, вехуьшде терсирем. Шиновуденге сес зенмере, гьэбирден чумгьоре сэхд сохдум. Э хисирей вонорум хуьшдере э войнеки. У омо, гуфди: Хисири. Белки эз расдеки гьич нечогьиш не биребу шову, лул пиён бу. Белки гьемме гофгьоюш э сереботи профессор оморей э шегьер иму дургуни. Ечиш нибу. Эдем рафде э пушорэхьи куклейме. У э иму гьеммере кумеки мисоху эри егьин дануьсде.

Алхаз: Э у фикиргьои и фэгьире сермеш дие. Эле, чуть биче зей у Гуъли. Иму биёбур бирейм. Зенмере, у динже сабурлуье Иричкереш беде зентуь эз рэхь миведировуну, эмеш хьэлово мисоху. Чутьтам иму э и коргьоревоз эз женг хилос бошим?

Шолум: Бовор нисохи, серме эз шовуне шоробгьо дорд дорбугеш, этте зенме эз хуне ведироморе, э вокзол э пушорэхьи Пинхас эри рафде, дуь мунутиш не гирошд, партальной мере жингире хуно вокурдум, эз хунейме вирихдуьм эки туь.

Алхаз: ГьейсэгIэт чутьтами холтуь азизе шуьверле? (*Сохдени эз зугьун Гуъли*). Имогьой ордениш нидуь туьре (*Хэндуьсдени*).

Шолум: Эгене руьхшенди сохде? Ненге туь э меревоз не бирей э у жегьендемие ресторан? Песде негуи э ме, яґни, ме диреш не дирем, биреш не бирем, яґни эз мелле дескенит, э мелле мешет мебошит. У лап культурний жиге истиге, гу э ме, бирор, эйчуь эз шороб ресторан эз гьемме жире шоробгьоре хуно сер одоми дорд доре?

Алхаз: Эри сер дорд не доре, туь кемию профессор боши, е небуге мере председатель колхоз семе... Председатель колхоз и гофгьойтуьре мишиновусдге, туьре динжиш нигьишд, эз кориш пиш мисохд.

Шолум: У эзже дануьсде? Ме унгьэдер эз председатель ней терсиренуьм, чендгьэдер эз зенме хьэлегигеруьм. эхи Пинхас эгьуьлменде гґэили, у гьеммере очугь мисоху эй дедешу.

Алхаз: Эй, вирих, пэхьни бош э меревоз эеки. Пинхас э духдермеревоз эдее оморенуьт. Эзечи зу чутьам вохурдет э еки угьо? Чуьниге э и кор дери, туь мере варасирени, Шолум?

Шолум: Вирихим, туь бура э пушо, ненге серме эз хьэлегигери э пушой чумгьой энугьо офдоре, веди бире эдее гиж бире, вежеисдегьо гьово возире, гуйге э бедмозоле серме сад сазандар нуьшдет, гьемме э еки эдет гьовогьо зере... Туь э у кор, э гґэрей энугьо веди биригьо, меш эдем диреш шор нисди...

Рафденуьт, дуь екире эз дуьшгьой гирде. Диреморени Пирхас ве Марго.

Пинхас: У сал не бирем ме э хуне. Бебеймеш э пушорэхьиме не ведиромори. Э хунеш неде. Эжеи бу? Дедейме бегьем дуь гофиш не гуфди, коргьоймереш не пурси, гуйге кеси эриме. Эз киму, мугу коминиге профессор оморебу э шеьгер, э бебеймеревоз шинох биребу. Э инжо чуьниге темиз нисди, чуьнки гьемме профессоргьойму гьеле э кор деруьт, э отпускиш екишуш гьелем не рафди, ме егьин дануьсденуьм. Бебеймуш песде эз и хоме одомигьо нисди эри уре кес фурмунде.

Марго: Бебеймеш э и торике торих дери. Эйме оморенигьо, угьо хуьшденишу дедегьоймуре фурмундет э ресторан эри рафде. Чуюкле гІэиллегьоре хуноют гьердуюшу. Муйгьошу сипи бири, оммо эз пиёнискеи жейле бире нисе воисде ишуре.

Пинхас: Эзечуьниге ме гьеммере егьин мидануьм, эз дедеш пэхьни нисохум. Эхи эри энугьо гІэйби, келемердоют... Бошку, у коргьо мунугу гьелем. Ме туьре е сал не дирем. Туь эз умогьой лап келе бирей, тойгІэруьс бирейтуь, гуьлишонлуье вэхд зиндегунитуьни. Гьеммише рач бири, диеш рач бирей. Туьре диренге, серме гиж беребу эз шори.

Марго: Оммо туь гьич дегеш не бирей. Гьисдигьо шори ве товуш чумгьой дедешму туьни. Гьемише туьре э ёр овордени э нуьшдеки ве вехуьшдеки э кориш. Э э кучеш. Дие чуьтам тэгІриф дуьге туьре нисе дануьсде. Екем мэхьэл эз туь когьоз не омоге, у лап гьэдерсуьз гьэйр кешире, э иловле чуьниге нисе дире бегьем. Туь эримеш лап кем нуьвувьсдей эхи. Ингьэдер вэгІдо эри хундегьо гереки э хьисобевоз. Ме дануьсденуьм, туь гьеммере эз гьово, гуйге вози сохденигьоре хуно варасире, тербие эритуь эз эвир кеширеш асанти, дие эйчуь не нуьвувьсдей?

Пинхас: Мере омбар нуьвувьсде хьэз нисе оmore. Оммо туь гьемише э ёр ме дери, эдуьлме дери. Э телефоновоз э дедебеберевоз гоф сохдеки, гьер гиле пуьрсиренуьм, эз Марго чуь хэбери, хундеигьою чуьтами. Эдее гуфдире, туь ишкулере варасденге, холибоф бирей. Ме е холинче, туь бофтейгьо, э выставка дирем. Туьре лап эдее тэгІриф доре дануьсдегоргьо. Дие нихуни?

Марго: Имисал имид дори мере директор иму э келе шегьер мифуьрсу мере. Ме художник мибошум. Песде вогошденге, эгене э фабрикей иму кор мидуь мере. Эз у зиётте гьисмет ме нисе гешденуьм.

Пинхас: Ме эз коргьойтуь лап шори сохденуьм, чуьтам эз мозол хэгьер шори сохдеге одоми. Туь дануьсдени, мере хэгьер нисди...

Марго: Туьш эриме бироре хунои...

Пинхас: Мере э туь е гоф гуфдире воисде. Чутьтам гуюмгеш нисе дануьсденуьм, белки туьш рази бисдори. Гъэйри мебош, бошку? Э гъейсэгІэтине девр куьгъне гІэдотгъо эдее фурмуш биренуьт. Иму гъелем лап чуюкле бирим, бебегъойму бироргъоре хуноют, бебешму нийлуь туьре э ме рафде, туь хуьшденитуь рази небисдориге.

Марго: Туь бегем разини, эз метлебгъой бебегъойму разини? Пинхас (*евошлей*): Мепуьрс... Чутьтам рази нибошум. Туь ченд гиле э ховгъоймеш оморей. Себэхь бире эз хов вехуьшдеш нисе воисдебу мере...

Марго: Хуб гуш вени, Пинхас, Туь гъелем хундеире туьре не варасдей. Эз дуь салиге мивегири диплом туьре, песеде веди мибу. Оммо туь дан: ме сад салиш э туь миденишуьм. Эз туь бэгъэй мере екиш герек нисди. Токи туь екем сабур сох, герексуьзе тэхьди месох те вэхд иму оmore.

Пинхас: О, Марго, туь мере имбуруз эз ниегъоймеш зиед мозоллу сохди. Ненге гене хов диреньум? Токи мере екиш хэбер несоху. НэгІ, хов нистигеш, ме серсон не биремгеш, и шоре рузе э согъэ гІуьмуьрме фурмуш нисохум. О, нумгир...

Марго: Ме бурам э кор. Гофме эз сенгъиш сэхди. Токи тэхьти месох.

Марго рафдени.

Пинхас: Сие чумгъойтуь гуйге астарাগъой асму гъемише э пушоймени. Туь чуьшмере хуно мере кур сохдей. Мозолмеш, муьрдеймеш э дестуь дери.

(*Хундени мэгІни*):

Э богъгъой гІуьулом гуьлгъоре
Ки мишумору, духдер?
Оммо туь тэхьной эйме,
Дуьлмере эритуь бер.

Астарагьой эн зевсерсерму
Ки мишумору, духдер?
Еки эз угьо туыллей,
Эз угьониге звер.

Ниетгьой одомигьоре
Ки мишумору, духтер?
Ме э хов биренге туьре,
Мере нисоху хэбер.

Э гьумьур эн гьер инсон бирени хубе руз. Ижире руз ме суьфдеден эдем диренуьм. О, астар эн дуьлме...

Перде фураморени. Дуьгьимуьн картина (шекуьл).

Чойхуней. Дуь истули. Эки еки эз угьо нуьшди дуь мерд. Э мигле э жейлее куьрси нуьшди чайханщик Ирмигьо. Дироморенуьт Алхаз ве Шолум.

Шолум: Шохьонгум эдее бире, эгенеш терсиренуьм э хуне эри рафди. Хьэриф эн Гуьли кирей? Ме э пушой энуну, гуйге муш э пушой назу биренуьм, гуйге бегьеме терсенгогь, оммо э довго эз гунилей дуьшмеш гьич хьэлежигер имогьоинере хуно небирем. Песде говунме чуйни – ме эз бебе бирем ижире луйти. Э руз ю едуь пейле семе ичку не хурдумге, хьисоб сохденуьм эй ме, у руз неогь пуч бири.

Алхаз: Иричке эдее гуьфдире, зентуь э туь денишири э хуне. Э иловлеш нисе денишире, не гов не е тике ну ней хурде – эзечуь воистени уре дузире дануьсде. Ме э имишевинеьтуь гьич бэхили нисохум.

Шолум: Э-э, гофгьой зе гов эг нуькерере хунои. Гьейсэглэт у лап гьосиш бисдоге, эз е лэглэзойге мивини: эз лэглэй ю гьэсел эдее тигьы бире. Меш уре хоши гирде евош-евош эдем хуте бире...

Алхаз: Эйме оморинигьо туьре у эгъуьл тозе шинохтуь дори.

Шолум: Коми шинох? Ме э екиревоз шинох не бирем. Гофе дуз, очугъ гу!

Алхаз: Эз ёртуь рафди у дигъине профессор, эри коми туь ресторане сэхд сохдей? Енебуге туь эзме белки пэхъни сохде, у академик бирей?

Шолум: Весси дие, и шите гофгъойтуь мере хэсде сохди. Эй туь мэхсере оmore и гезирогъойме? Кидан ме имишев эже михисуьмге.

Алхаз: Е жигейге не офдиге, ме туьре согъэ омбор шороби мидуьм эри хисире. Чендгъэде воисдге дуьлтуьре, шороб михури унжо те себэхь.

Шолум: Бовор сох э ме, дуьлме эз дерд эдее лов бире. НэгI, хэндесуьз – гъисдигъо-нисдигъо е гIэили мере, уреш ней офденуьм гIэмел эри огол зере куьнд экиме, гъэл гирде, моч сохде. Эхи вохурдге у э ме, ме сургъоймуре, биней шову биригъо коргъоре егъин бие гуюм э у, дие чорейге нисди эхи. Гоф э дедешу гуфдирейш нисди, эхи ме э пушой энэ эз гIэиб бие хьэл-гIов бошум.

Алхаз: Куке э и коргъо медеше. Ишму э зентуьревоз миданит. У гьемме пестейнеи. Суьфде нуьшде хуьшдере неогъ хурде герек нисди эри биригъо кор, белки эгенеш дуьл зентуь нерм бире, белки шовунере фурмуш мисоху. Неогъ гэйр меди хуьшдере. Туь негуи эме чуь имогъой мисохим, имуре э чуьревоз хэндуним? Ебореминжи имбуруз выходной, эз кор хэвлете рузи. Дуьбореминжи руз пишнеи эдее бире, иму гьелемиш е пейле шоробиш не вешендейм. Эзи гиристегъойтуь чуь хэйри эриму?

Шолум: Уш дузи, э жунме, э жун мердхуьсуьрме. Дирей туь э пушой чойхоне э серини эзир доргъо нуьшдигъо одомигъоре? Биё фурмуним угъоре, песеде е хэйли михэндим, угъореш хисире нийлим.

Алхаз: Чуьтам?

Шолум: Эй хьэзле женг мигирим э туьревоз. Ме мизенуьм, синлегерме мисохум нехогъойтуьре, туь хьэрой мидешени...

Алхаз: Гъеме хуби, токи мере хэр месох, туь мунош, лап эзи хомлего нисдуьм эри туь. Хубчи, туь нэгI, ме мизенуьм, мивенуьм, мидедуьм, мипоскунум. Туь, туьре лап эзечиш, дур гердо, дорд доге, хьэрой деше.

Шолум: Эле, и делуьники. Туь бегем дуьшменмени, туьре эжире риетго эйчуь биё бу?

Алхаз: НэгI, эз войнеки дие.

Шолум: Бошку, гьердуйму мизеним, хьэрой ве гирьере гьердуйму мивокуним. Хьозур бош, мугьует бош, ме эдем сер гуьрде.

Венорени эз Алхаз е синле. Песде уш жогьоб дорени. Сес хьэрой-хьуьшули. Чайханщик Ирмиго вэхуьшдени эз куьрси, диренге женге. Видовусдени э лой куче э хьэроевоз.

Ирмиго: Эй, гьэрзул! Дуь серсон эз делуьхуне ведироморет, э и динже жиге дуь-екмре эдет куьшде. Милиция!

Дироморени милиционер Салман.

Салман: Гьери куьнд биёйт экиме. Гьери гуит нумгошмуре.

Шолум: Эри чуь хьэлево бирей э иму? Чуь воисте туьре эз хьэрмэхьме?

Салман (э мэхьтелиревоз): Чуьтам чуь воисте? Ишму э жигей жэгIмети эдет женг сохденит ахи.

Алхаз: Шолум, и чуь гуьфдире? Иму женг гирдейм?

Шолум: Э хьовир милиционир. Туь бегем нисе дануьсде чуьниге бокс?

Салман: Ишму кидан мере хэр офдейт. Не гуит песде э иму ишму боксерит гуьфдире? Мереш екем хуте не сохит?

Шолум: НэгI, бегьеме боксерго иму гьелбетте нисдим, ме туьре нифурмунум-о! Оммо имуреш э у бокс возире хуте бире воисте. Бегем имуре ижире ихтиер нисди?

Салман: Дие эйчуь хьэрой дешендейт, дие эйчуь гиристейт?

Алхаз: Имогьой дес хьэрмэхь ебирден э сифот расиге, дордиш мидуь дие. Оммо иму дуь бироре хуноим, э жун Худо.

Шолум: Бовор нисе сохдеге, хуб дениш э иму. Диренит, иму эдейм дуь-екире гьэл гирде, моч сохде. Бегем дуьшмегьо мисоху гьечи?

Ирмигьо: Бэхшлемиш сохит, хьовир милиционир, не варасирем биней коре.

Салман (э гьэйревоз): Дие туь, чайханщик, эричуь хьэрой сохдей, мере эз кор деиштей. Дие ижире гьэлети месох, ме э кор хуькуьмети дереум.

Ирмигьо: Бэхшлемиш сох, не дануьсдем. Дие гьэлет нибошум.

Салман: Эйме сифогьой эн эни дуь боксёр шинохе хуно оморе. Эже диремге угьоре эз ёрме ведарафди эхи... (Рафдени).

Шолум: Эй, Ирмигьо, туь эхи эз иму терсири. Лап женгиш мибистоге имуре, туь милиционире эри чуь бие инжимиш сохи. Беге имуре дие гьуллугь нисди. Дениш-о, эхир эни коргьойтуь ник нибу... Э иму бэхили-чи сохдениге, бигьо э имуревоз туьш боксер бош...

Чайханщик, екем лерзире хуно, вогошдени э жигей хуьшде. Нуьшди э сер куьрси, ширине хов диренигьо одомире хуно.

Алхаз: Ха-ха-ха...

Шолум: Хи-хи-хи...

Алхаз: Бошку, зарафет сохдейм, весси дие.

Шолум: Мере воистени и хэре чайханщике диеш хэр сохде. Ебо кеш бурайм э меревоз э шоробтуку, востоним э унжо е шише коньяк, эри хурде э чойхоне мийём. Дениш, ме уре жингир не сохдумге.

Рафденуьт э хэндеревоз. Оморени милиционир Салман.

Салман: Э, Ирмигьо, угьоре имогьой шинохдуьм. Угьо дуь хьэрмэхииш гьисдуьтге, лап зиёд вешенденуьт. Э ме дениш. Угьо э

инжо э шороб-эрэггиревоз оморуйтге, видов э песойме, меш угьоре гирдуймге, дие дэгІно низенуым, бегьем штраф мивегинуым эз ишу. Эй согъэ гуймуыр ишу мимуну, ненге ме Салманиш нисдуымки.

Ирмигъо: Бошисте. Ме гуллуугътуьре гьемише миворовунум. (*Салман рафдени*). Эз расдекиш офторутге луьл-пиён, чьутам мисохум ме гуллуугъ эн Салмане, мере эхи мизенуь-микуьшу песеде. Бегем ме дирем э хуьшдени чумгоймеревоз, чьутам угьо беде синлегьо дуй эз еки веноребируйтге. Гьелем игьо хьэрмэхьой екини, чьумени кесе те муьрдеш мизенуь.

Оморенуьт Шолум ве Алхаз.

Шолум: Эй, чайханщик, эри чой хурде оморейм, зу бош. Ирмигъо: Чорейме чьуни (*Бердени эри энугьо чойник ве пейлегьо*).

Чайханщик вогошдени э жигей хуьшде, гуйге хисири, оммо эз зир чум тиж эдее денишире, хьэлегигериш гьисдиге.

Шолум: Гьери зу деки. Оммо хубчи у нивинуь (*Гуфдирени сэхд, Ирмигъо хуб шинову гуфдире*).

Алхаз зури-зури, эй хьэзлегьо, гуйге э пэхьники, декирдени э пейлегьо коньяк. Шишере норени эзир эн истул. Хурденуьт, Алхаз декирдени песеде э у пейлегьо чой.

Ирмигъо: НэгІ, ме и беде коре вотовусде нидануым. Гьерчуй бисдо-бисдо.

Рафдени эз сегьне, вогошдени э Салмановоз.

Салман: Ишму эгене инжоит, боксергьо? Эри чой хурде оморейт эз и динже одомигьоре хуно? И чуй шишей? Ведешендени эз зир истул тие шишере (*У гьисди шишей масти*). Эле,

эгене мере фурмундуът игьо. Ишму эри кефир хурде оморейт э чойхоне?

Шолум: Эхи иму, ховир милиционер, боксергьо эдее биреним. Имуре женг хуто сохденигьо тренер гуфдири: гьемише маст енебуге кефир хурит.

Салман: Гьери, э пейлегьошму чуй дери? (*Вегирдени э дес пейлей Шолуме*). Ишму э песой кефир дие и чой мехурит!

Алхаз: Эйчуь ахи, бегем ужире ихдиер нисди имуре?

Салман: НэгI, ме э сереботи ихдиер ней гуфдиренуьм. Ме дануьсденуьмгьой мере эдее гуфдиренуьм. Меш и пушогьо боксер биребируьм. Ки эз песой чой кефир хурдге, шугьэм энун те эхир хэраб мибу. Ха-ха-ха.

Салман рафдени.

Алхаз: Эле, белки у дуз гуфдире? Видовим, Шолум, эки духдир...

Шолум: Туь чешмиш бирей. Иму бегем имбуруз кефир хурдейм?

Алхаз: Эле, ме эз расдекиш чешмиш бирем. Ха-ха-ха...

Шолумиш хандуьсдени. Ирмигьо дениширени э угьо э серкуширевоз. Гьебирден хэндей дусдгьо гуйге э кордеровоз бура омор: эз е лой сегьне веди бирени, куьнд оморени Пинхас.

Шолум: Эле-ле, эхирме куьнди. Те дир бире вирихим Алхаз-бирор.

Дениширенуьт э е лойге. Эзунжо ведироморени Марго .

Алхаз: Дири. Иму э беде есири офдорейм, Шолум. Ги мере, ненге эз куьрси эдем офдоре. Угьо имуре бегьем биёбур мисоху.

Пинхас: Туь мере хош оморейш нисе сохде, бебе? Белки не шинохдей куктуьре? Кидан, ме э ёртуьш немундем...

Шолум: Хош оморей, хэлефме! Кур бирем, бэхшлемиш сох келемерде!

Марго: Э бебе, туьре бегем те имогьши гисне не бири? Туь рузгьойге те и сэгГэт дуй-се гиле семе чи хурдени. Имбуруз пушой себэхь, те товуш офдои веде бире, вирихдей эз хуне. Гьштов нисди туьре?

Алхаз: Чуймуни келе мердгьоре омбаре чи гереки бегем? Е лугьо нун бисдоге, иму э уревош сирои биреним. Туь хош оморей, Пинхас, гЭилме! Кейф-хьолтуь чуйтами? Профессор туьре е хэйли тэгГриф дори...

Шолум: *(Зерени эз пой Алхаз)* Туь чуй хунде, бирор? Э туь герми расири?

Пинхас: Эйчуй, у дуз гуфдире. Дие чуй хубе гоф-хэбер шиновусдейт ишму эзу бедмозоле профессор, лелей Алхаз? Гуит, меш бие дануьм.

Шолум: У бегьем бегем диреш дири профессор ишмуре, Пинхас? Пуьрсире воистениге туьре, эз ме пуьрс, ненге у эритуй гьэриш-гьэрише гофгьо мигую. Уре эз шовуревоз чуйниге хубе хьол-хьэёл нисди.

Пинхас *(э суьплее хэндеревоз):* Эчуйниге туь гу, эриму бэхше нисди.

Шолум: Иму, туь гуфдиренигьо, гьич э гуймуьрме професориш не дирем? Мере э Масков э выставке фирсоренге, э академикоревоз пейле зерем... Гм... Гм... Профессор ишму э колхоз омореву эри дануьсде ченд студент имуре герекиге имисал э вэхд богьчирегьо. Председатель уре э меревоз шинох сохд, гуфди: Кук эни ведилуье корсохиму экишму хунде. Нумтуьре дануьсденге, омбор тэгГриф до туьре. Бэхдевери гЭили, мугу, мозоллуни бебе-дедей эн ижире кук. Оммо ме эдее диренуьм, туь эри мозол ве шориме гьич хьэрекет нисохи .

Пинхас: Туь эз ме эхи гьэйри-гЮсини? Эзечуй эйчуй? Ме зобуне кор енебуге зобуне гоф семе сохдем э туьревоз?

Шолум: Дие эйчуй дениширей э ме э руьхшендиревоз, ме гьелем кур енебуге хэр нисдуьм эри неварасире. Кидан, эйме

эзечуь оморениге, туьш бедмозоле дедейтуьре хуно э ме бовор ней сохде? Дуз гу: эзечуь нисд?

Пирхас: Ме э туь, бебе, те имбуруз гьич неогъие гоф не гуфдирем. Ме чуйтам хуьурмет келетегьоре гирде герекиге лап хуб варасиренуьм. Оммо имогъой дие чоре нисд Туь э сереботи дедей ужире нифригъо ние сохи, чуйнки уре эз жунсогъиму бэгъэй ечиш герек нисди. Текей туь биебур мисохи имуре э гПэрей хэлгь иму? Эри дануьсдейтуь гуном: эз киму имисал екиш нисе оmore эри онгурбогъоре чире. Иму э е кориге мирайм э и гьеминон. Ме дургунумге, гьери гу нум энупрофессоре.

Шолум: Ме имогъой пир бирем, рушгъоймеш сип-сипини, верф зимистуре хуно. Песде ме эз себэхьмундеревоз е тике нуш не хурдем гьелем. Мере гисди омун э туьревоз хьижет эри сохде?.

Пинхас: Ме э туьревоз хьижет ней сохденуьм. Оммо эдем эхири гиле хосде эз туь: веси, и коргъой гПэилире ше. Ненге ме дедере эз китуь миберуьм, гьерчуьтам бисдо мизигьим, е лугъо нуниш гьэгъед нибу эриму.

Шолум: Туь мере терс доре? Не дебу э ховгъо-ниетгъойме ижире руз.

Пинхас: Ме нисе фурмунденуьм туьре. Хосиетме э туь омори: гуфтируьм е гиле – варасть, еьин мосохум у коре.

Марго: Э бебе, эз ерме вадарафдебу эхи: амбарек бу, туь эдее э жигей гьевеление председатель нуьше эи зуригъо!

Алхаз (*терсирере хуно*): Довмеш бисдо! Ки гуфди э туь, ме ечиш ней дануьсденуьм. И чуй тозе хэбер туь дорей имуре?

Марго: Лелей Шолум, орденишмуш амбарек бу!

Алхаз: Э Шолум, и гПэилгъоймуре чуй воисте эз иму? Эдембирим динж пейлей чой имуре хурде, игъо э бебегьоревоз эдет хуьжет сохде, э динжиму нисе гьишденуь имуре.

Марго: ГПэиле зенде четине кор нисди. Шороб хурдереш тэхьэрюни. Оммо эй гПэилгъой хуьше хуб бире, угьоре э рэхь-медуьли хуте сохде, эгъул доре - у кор гьич асант нисд.

Алхаз: Весси-о! Туь дануьсдени, духтер куксег, мере омбар гьэйр дориге, песде мере гирде нисе бире. Эз кеево хоегъо керге

хуте сохде? Ишму эйму эй нубо хунде оморейт? Гьейсэг! Эт иму гъэишгьоймуре мивекеним. Сэхд ги мере, Шолум, ненге э пушой эни хэлгъ уре синлегерме мисохум, дие мере минкин динж поисде нисди.

Шолум: Бошку, Алхаз. Чуть сохдигеш, чутьам не денишигеш, угьо дузи. Оммо угьо имуре хуно четинигьо мивиниге э гъуьмуьришу, э имуревоз эзечи гоф нисохдут. Бэхшлемиш сох э жогьилгьо: имуш э въздиму ужире бирим, келетегьоре эгъуьл доребирим.

Алхаз: Эле, фэгъир эдее гиристе. Сур бошит эз инжо. Ме хьэрмэхьмере нигъилуьм гирисунде. Гьейсэг! Эт эз чумгьоймеш г!эрс миёв.

Марго: Кеш, Пинхас. Белки иму серкуш зереймгьо угьоре, кумеки мибу.

Марго ве Пинхас рафденуьт.

Алхаз: Нэг!-о! Алхаз э гъуьмуьр хуьше э г!эилиш не гирисди. Эри г!эрсгьой мере дире келе коргьо гереки.

Шолум: Дирей, чутьам имуре дэг!но зерет г!эилгьойму? Чуть хуби эйме ве туьни. Балагьойму имуре эдет эгъуьл доре.

Алхаз: Туь винири, чутьам кук э гоф духтерме дениширениге? Чуть мибу, чуть миведиров эзи кор, чутьам оmore эйтуь?

Шолум: Чуть мибу? Шори-ники! Эз дуь сал бэгъдо Пинхас хундеире миварасу, э хунеш миёв. Э у гьеминон г!эруьси мивозим. Ишуь мидануь...

Алхаз: Эри, хубе г!эигьои, дуь-екиреш хосденуьт. Чуть имуни луьтигьо-дургугьоре ижире г!эсуьллуье г!эилгьо чутьам бири?

Шолум (э хэндеревоz): Меш мэхьтелуьм, э чумгьоймеш бовор нисе сохденуьм, эхуьшденимеш ихьтибор нисди мере, оммо гьемме дузи.

Алхаз: Руз выходноиш эдее варасде. Туьш дануьсдани: себэхь туь э кор э омбор шоробиме бие бией. Председатель эдее

фирсоре гьеммере эри кумеки сохде.Филенгээдер кори мере. Оммо у коре э жигей е орине, э гээриш дуй мегьиш божехьэт сохим, варасим ме не туьни. Эйтуь чуйтам оморе? Ненге эгенеш эз омбор шороби культурни ресторан хуби?

Шолум: Вой эй ресторан э пушой шоробгьой колхозиму. Туь лап хубе жире эдее теклиф доре. Оммо терсиреш-терсиренуьм: э миглей ингээдер пичинке э шоробовоз хуьшдере э дес гирде ниданим, гэдуйр хурденимгьо чигьоре вир мисохим. Э, чуй мибуге-мибу...

Сеимуьн перде.

Э расди логь эн сегьне омбор шоробини, дуй куьрсиш. Э песо вединуьт эз когьоз сохде оморигьо пичинкогьо. Э чеппи логь тигье жигей. Оморенуьт Алхаз ве Шолум. Векенденуьт килите, вокурденуьт дер омборе. Дарафденуьт эри кор сохде. Шолум вегирдени э дес кечуьке, эдее мих зере э тикей тэхте. Алхаз эдее чуйниге нуьвуйсде.

Шолум: Туь эгене эдей чуйниге нуьвуйсдеки. Шогьир бире эзимбэгьдо?

Алхаз: Кортуь э кечуьковози, корме э гээлемевоз. Туь чуй варасире?

Шолум (*шендени тэхтэре э хори*): А, туь мере хэр хьисоб сохде? Эчуьниге туь хуьшденитуь гьуч сох и пичинкегьоре. Миденишим эз дестуь чуй ведиромореге. У хатлегьо туь нуьвуйсденигьо, чуйкле гээиллегьо э ишкуле хунденигьо эз сад туьчуьни хуб мидануьт.

Алхаз: Эгене жингир бисдори? Омбар гоф сохдиге, миведекинуьм туьре-о!

Шолум: Туь э меревози? Мере ведекирде туь? Ме имбуруз э туь не бурмундумге, ме Шолумиш нисдуьм.

Алхаз: Э пестеиней. ГьейсэгИэт корлейтуьре сох. Ме имбуруз начальник туьнуьм, дуз нисд?

Шолум: Туь хьэрмэхьме нибисториге, мизеруьм туьре ми-куьшд. Э Худо шуькуьр сох, ме туьре кем-биш шинохденуьм гуфдире. Ненге э ертуь не мунди, ченгъэде ме э туь поскундемге? (*Эгене вегирдени кечуьке э дес*). Десгьойме эз шовуне коньяк эдее лерзире. Э жегьендемии Алхаз, мере е пейле дерму неди, ме не-чогъэ хуноюм.

Алхаз: Хьэзбошолум. Туь фурмуш сохдей, чутам имуре куктуь э духтермеревоз э еки серкуш зерет? Туь эз гофгьой Пинхас ней терсире? Негьогъ, негьогъ у э туь омори: гоф гуфди – вараст.

Шолум: И чуй гуж э серме омори, е пейле шоробиш хьэруй-ми эри ме?

Э хьэът веде биренуьт Пинхас ве Марго.

Пинхас: Ме имбуруз биё вогошдум э институт. Эз дуй ори-нейге миём э хуне эри дуй мегьи. Чуьтам туьсуьз гьэрол миги-руьм?

Марго: Меш эри рафдейтуь эдем гьэир кешире. Ечиш нибу, амбар нипоики.

Пинхас: Ме шову мэгИни нуьвусьдем. Хунум эритуь?

Ме эки туь оморенге,
Лап кутэхь бирени руз.
Гуьл ватанмере диренге,
Сере ней гирденуьм гьуз.
Е рузле туьсуьз бисторум,
Дуьлме эз герми сухде,
Доре эри ер ме дорум,
Эй ме мунд хуьшке тэхде.

Чуьтам оmore эри туь и мэгИни? Нихэнди э ме ?

Марго: Туь бегьем шогьирики. Ме те имбуруз дануьсдеш не дануьсдем. И суьфдеи стихигьойтуьни? НэгI, эз расдеки, мере хьэз оmore.

Пинхас: Эри е оринеле рафденуымгеш эз хуне, эгене дуьлпесоюм: тозе беди несоху, гене дедере неогъ гъэйр недуть...

Марго: Туь дигьине суьгьбете э уревоз фурмуш не сохдей? Лап э ижире хуьршевоз э беберевоз эхи гоф ние соху.

Пинхас: Меш эдем гъэйр кешире эри шовуне. Дие чуй чоре бу мере?

Марго: Э пушой рафде туь нивини уре? Согьбоши нигуи?

Пинхас: Туь мере омон неогъ серкуш зере. Ме бегем уре нисе хосденуым? Метерс, тумгьой эн хосиет ю э меш дери, сибиш эз сибдор лап дур гьич ней офдоре. Бебейме эз хуьшде зобуне одоми нисди, ме уре зобу хьисобиш ней сохденуым. Гьемме хьэрмэхьгьойме миест уре хуно бире. Расди, хурдени эрэгьи-шороб эз гъэдер амбар. Оммо э гьуьмуьр хуьшде у е одомиреш фэгьир не сохди, кориш эз десию веромори, хубе снигЭткори, эз кими инженергьош амбар дануьсде.

Марго: Дуьлпесо мебош, иму э у миденишим, песде э хотур туь э бебей меревоз эеки белки динж поисдуьт. Угьо имбуруз эеки э омбор шороби эдет кор сохде, пичинкегьо-челегьо гьуч сохденуьт. Олхоин бош, гьеммеш хуб-хос мибу, гьелем шор мибошим.

Пинхас: Дедейглойму эдее оморенуьт. Мере гешденуьт э хьисобевоз.

Марго: Дие ме бурам, имуре эеки виниге, егьин угьо эрчуь бисдо мигуют.

Марго рафдени. Оморени Гуьли ве Иричке.

Пинхас: Ме имогьой э вокзол бие бурам. Э е оринейге э хуне деруьм. Эме денишит э беберевоз, дуь екире гъэйр медит. Коми мерд нисе хурде?

Гуьли: Бошку, аззи. Эри женгьойму дуь кепикиш меди. Э метелегьой урусгьо неогъ гуфдире бегем: зев ве шуьвер е садани.

Иричке: Э Гуьли, дие гЭзиле гирде мепой, ненге эз рэхь муну. Мэхьэл вогун рафдеи. Эхи уре гьэуллугьгьоюни.

Гуьли: Ди моч сохум туьре, Пинхас, кукме. Шор рафде, шор биевош. Фурмуш месох: иму э туь э тобсуьзиревоз дениширейм э инжо.

Пинхас: Согъбоши, дедей. Согъбоши, холей Иричке.

Пинхас рафдени. Э пушой эз сегъне ведарафте, чаруьстени, десе жумундени, э мигъровуниревоз хэндустени.

Гуьли: Имуре хар хьисоб сохденуьт и гЭилгьойму, гуйге иму уре э духтертуьревоз ич э еки не дирейм. Э ертуь мунди, чуй гоф доребиримге иму дуь-екире, пушой гЭилгьоре зенде, ахи угьо дуь э зеки келе-чуьклеи дуь мегъиш нисди?

Иричке: Чуьтам не муну, угьо нумгиргьои. Оммо имогьоине гЭилгьо э у куьгъне гЭодотгьо бегем дениширенуьт?

Гуьли: ГЭодотсуьзиш ме егъин дануьсденуьм: угьо хосденуьт дуь-екире. Мивогошду Пинхас эз хундегьой хуьшде, э у сал гЭрси мивозим.

Иричке: Эз ме пуьрсириге, ме разинуьм. Туь э шуьвертуь бэхширей шовуне дердгьоймуре? Ме те муьрдеш у коре фурмуш нисохум.

Гуьли: Туь чуь хунде, ме Гуьлиш нистуьмки, э угьо жогьобишуре не дорумге. Туьш кумеки мисохи э ме жозей ишуре эри доре, дургугьоре, хаспушгьо-пиенискегьоре, дуьздгьо-гьэчэгьоре.

Иричке: Туь дан эритуь: чуьтам шуьвергьойму хурденуьт, меш э туьревоз э еки гьэйргьоймуре эри ведешенде эз угьо гьемеше разинуьм. Гу, расди, чуь воисте туьре сохде, эз ме олхоин бош – туьре нифурухум.

Гуьли: Кеш, э рэхь мигуюм, угьо эдее кор сохденуьт э инжо, нехэбереки не ведировут эз омбор э куче, суьгьбетимуре не шиновут. *(Рафденуьт)*.

Э омбор шороби.

Шолум: И жегъендемеие мих э мунитию е гиле эдее гьэдгьуд бире. Тэхтеш тэхте нисди, эз овуш сэхди.

Алхаз: Е михеш э тэхте туь зере нисе дануьсдеге, дие чуй мерд бистори, дие эри чуй кор эй туь орден хьозур сохди гьишде. Хубчи хэлгь колхозиму э инжо нисди, ненге гьемешу э туь руьхшенд мисохд.

Шолум: Эри веги сох дие, эз дестуь ведироморениге. Зугьунтуь дурази, азизе сернуьш эн игиде колхозиму.

Алхаз: Ченд гиле гуьом э туь: гьер одомире кориюни. Ме михе э тэхте зере э ишкулеш хуте не бирем. Корме хэт нуьвуьсдеи, шоробе пеймундеи. Ингъэде омо, ингъэде рафд. Эз инжо вегирдим, э инжо декуьрдим.

Шолум: Хьэйф, туь хьэрмэхьмени. Екийге и руьхшендигьоре мисохдге э ме, кемериюре бэгъэй хуьрд нисохдум.

Алхаз: Чуй ихтиери туьре э сер киш не бисто десе эри гьово гирде. Ечи ме имбуруз начальник туьнуьм, мере нори э кортуь эри денишире, буйругь э вэгIдою эри доре. Туь э гоф бие дениши, чуйтам солдат э гоф генерал дениширениге, енебуге мере ихтиер гьисди э кор не дегьиште туьре.

Шолум: Эй, начальник, вэгIдой эн е лугъэ нун хурде не бири гьелемиш? Руригьойме эдей суьхде эз тешнеи.

Алхаз: Ме неварасируьм эгенеш: туьре тешнеи берди ненге гиснеи? Енебуге туь э жигей нуш шороб михури, мереш пуч-хэраб мисохи?

Шолум: Э дестуь деригьо гьэleme хуно гердо зугьунлейтуь. Гофгьо де зиеди. Мэхьэл эн мэхсереш гиросхд. Жогьоб ди, э меревоз дусте воистениге туьре, ведеше эз дору у сие шоробтуьре, у муьнуькзере жэгIеш.

Алхаз: Туь екем гIэйбкеш кей мибоши, очугь гуфдирени рафде, чуй юре воистениге э и туьтем. Воистембу мере шенде и пиенискеире э туьревоз, оммо шенде ней гьишде – туь асланеш мигьили э гужевоз шороб хурде.

Декирдени эз графинке дуь пейле шороб. Нуьшдет.

Шолум: Чуьниге дуьлме эз себэхьэвоз эдее тенги сохде. Туь семе е дуьлхошие гоф мигуфдириге, белки гьовоймеш е тэхьэр

мибисто.

Алхаз: Гьисди мере ужире гоф. Эйме оморенигьо, у гоф зритуь эз гӀэселиш ширин миев. Туь дануьсдени, гӀэлгьойму нумгируьт. Дур гердо, угьо рази небистоге, имуре ихдиери э гужевоз гӀэруьси эри сохде. Оммо евошлей пуьрсиренге эз дух-терме, чуйтамиге гӀэрешу э Пинхасовоз, у гуфди: Эз кук лелей Шолум хубте гӀэл э ме не вохурди. Чуйни гофтуь?

Шолум: Э Худо шуйкуьр. Туь мере келе шори дорей гьейсэгӀэт. Эз дуь салиге гӀэрсид мивозим. Песде диеш куьнд мибошим эз еки, мозол невегьореш винош. Чуй дерд-гьэми имуре: хурим, гешдим, сохим кейф.

Алхаз: Э шори хубе одомигьо вегиним и пейлегьоре. Лехьэим.

Хурденуьт е пейлейгеш. Шолум вегирдени э дес тар, гьердуь-шу вежеисде-вежеисде хунденуьт мэгӀни:

Эхири рузгьой васал
Медеил эдуьлтуь гӀэрс.
Кор сохдейге согьэ сал,
Веже екем дусдме, арс?
Герм-гӀэтоши гьеминон
Бие эз асму, ворущ,
Мозоллуьни гьер инсон
Эз тикей эн сие нуш.
Зу бирени руз поиз.
Дир мундени зимисту.
Екиш мемуно гӀожиз,
Пур гердо диеш бисту.

Алхаз: Э Шолум, туь эз ме гьэйри мебош. Дануьсдени чуй. Э инжо гьисдигьо коре э дуь рузиш сохде бирени. Оммо туь хьовирме, бирормени. Коре зу месох, ненге ме песде эгене тэхьно мимунум э инжо. Эй гоф сохдеш одоми нибу э киме. Тэхьти не сохтиге, е мегьиш мидани поисде экиме.

Шолум: И лап е гофигеи. Имогьой ме эдем шиновусде сес мерде. Гъимиш туь киреи? Воистениге, мере и кор эри е салиш веси.

Эз улой дер оморенуьт Гуьли ве Иричке.

Гуьли: Шиновустебири сес мэгИнире? Эзечуь кор сохденуьт угьо?

Иричке: Биё зури-зури, чуь игърол сохдеймге э туьревоз веровуним. Эле, чуь гурунде килити. Гъери, кумеки сох эме.

Алхаз: Эй Шолум, туь ечиш ней шиновусде?

Шолум: Эз расдекиш, э песой дер киниге гъисди. Сес килит омо.

Гуьл дорени дере. Дер сэхди.

Алхаз: Киниге сэхд сохди имуре. Чуь хэре мэхсереи.

Шолум: Гъери бие дере хуьрд сохим, мэхьэл э хуне рафдеи.

Алхаз: Гъичиш ниведиров, гурунди энуну килит дуь килош мибу, ме э гъэстевоз востерем уре, екиш хуьрд-пуч не соху.

Шолум: Чуь сохим? Э инжо хисиримге, лап хиник мибу имуре. Кор ки бие бу и? Кидан, жегъендеиме зеннгьойму сохди.

Алхаз: Эле, эз расдеки. Угьо эз шовуревоз дуь э зеки дур нисе рафденуьт. Чуьниге лап э келе ихдилот дебируьт, ме оморенге куьнд, дие эз ишу сес-суьмуьгиш небу. Гъелбетте, эз иму пэхъники бу суьгьбет.

Зегьо э песой дер поисдет, гушгьоре куьнд гирдет эз дер, эдет э хэндеревоз гуш веноренуьт. Песде е гофлеш не гуфдире, лап сэхд эз лугъонди дуьлишу хэндуьстенуьт, рафденуьт э хуне.

Алхаз: Хэндере шиновусди? Эз гъэйр рестораниму сохдет. Гъемме коргьойтуьни, хоме сермере э чуь хижолети дешенди, соворлере хуно фурмунди деишт. Эз жэгъендеиме сертуь хэйр ки дири ме винуьм?

Шолум: Эри биригьо силис неогъ нисоху. Гъэллет сохдемгеш у гофе гуфдиреки, имогьой денишим, чуьтам эз инжо ведирой-

мге. Гьеммей хэлгъ те и сэгІэт э хунегьой хуыште рафди. Хьэрой сохдимге, екиш нишинову, э кумекиш ниев Э есири садан дерим, бирор.

Алхаз: Эрчуь бисдош эз и омбор иму те себэхъ ведироморе ниданим. Биригьо-бири, оммо гъэйр зенгьойму диеш амбар мигешдим, михурим, кейф имуре э гьемме жиге мивиним. Гьери, веги пейлейтуьре э шориревоз.

Шолум: Э шори гьердуйму. Лэхъзим (*Хурденуьт*). Алхаз, мере дие шоробиш ние воисте. Эйме оморенигьо, э и хьижет э зенгьоревоз ме не туйни бедхьисобим: гІшэилгьойму зу келе бири, эгенеш иму эдее кифлетгьоймуре биебур сохденим. Той ижире рухшендие коргьоим иму? Не шиновусди ди, чуьтам имуре гІэилгьо дэгІно зеревуге?

Алхаз: Мереш дие ич нивою пиенискеи. Чуь хэйр де эз расдекиш э ичку, гене э гъэдерию хурдге, коригеи.

Шолум: Дие иму чоресуьзи э инжо эри согъэ шев демундеймге, бие коре сохим варасим, эри себэхине ечиш нейлим. Э инжо эри чуьимунигьо мердгьо эри дуь сэгІэт кори.

Алхаз: Ме разинуьм. Эз дуьлиш э туь кумеки мисохум. Туь зэхъмет кеширеки ме э гьырогъле поистуьмге, дие чуь хьовир-бирор биренуьм ме эйтуь.

Кор сохденуьт. Шолум зерени мих. Алхаз буррани тикей тэхтере э мушаревоз. Песде э еки жару зеренуьт хори эн омборе. Нуьшденуьт.

Алхаз: Эже менетуьни бирейм? Согъэ довгІореш дуз те Берлин рафдейм. У рэхгьоре бегем миданим фурмуш сохде?

Шолум: Чуьтам э еки э пушой гуниле рафдейм...

Алхаз: Чуьтам э еки э у зурбое хиникигьо эн чул дуьимуьн сал тоб дорейм, хогьин бире, вирихде э хэлгьо-фикиргьой муш не дебири.

Шолум: Нуьшдимге гьеммере эри э ер оворде, согъэ шевиш божэхъэтиш вес соху, эже не бирейм, чуь не дирейм, чуьжире гезиргьо не ветовусдейм...

Алхаз: Чуьтам у келе зулумгьоре ве у зурбое игиди эн гьеммей хэлгъ советимуре э ер не биерим?

Шолум: Чор гиле ме ярауь бирем, се жегендемиие гуниле э жендекуьш расири. Оммо эз госпиталь ведироморенге, эгенеш менетуьни дуь екире диребирим, э еки вохурдебирим. Ме эзу часть иму дие э е лешгериш эри рафде рази не бирем. Туьш эзечуь.

Алхаз: Келе бесхунигьо бири. Эз содатгьо бэгъэй филенгъэдер зегьо ве гІэилгьо эзир бомбежка домунди, пуч бири. У Го-вунгьоре э номуссуьзе фашистгьо хэлгъгьой эн гІуьлом ич бэх-шире нидануьт.

Шолум: Мегу дие, бирор. Ненге гьейсэгІэт эз чумгьойме гІэрс миев.

Нуьшдет. Хэйли мэхьэл сес нисе сохденуьт. Токи Шолум евошлей э тар дес зерени, чуькле сесле оmore.

Шолум: Э Алхаз, туьре хиник не бири? Ме жилид зерем. Э гуьрвей зимистуш лап эзечи не бири, э хьисобовоз.

Алхаз: Чорейму нисди. Туьре нечогъ, суьтержен бире нисе воисденге, бигьо зури-зури, вэхд не кешире, кор сохим э инжо те гьистигьо. Те себэхь варастеш миварасим. Председатель гуфди-ребу э ме: зу вараститге коргьой эн омбор шоробире, гьердуьш-муре премия мидуьм, путевкеш э выставка э Москов.

Шолум: Те имогьой эйчуь мэгІлуьм не сохдей э ме. И чуь хэре хьэрмэхи мере, чуь не бисто гьемме эзме пэхьни мунде. Хубтеи эзимбэгьдо э чайханщик Ирмиеревоз дусди гируьм.

Алхаз: Коре варастенге, лап энтигъэе шороб михурим.

Шолум: НэгІ, ме дие те гІэилгьоймуре суьфдеи кук бире е дугъле шороб бисто, эрагьи бисто э ловме зерени нисдуьм.

Алхаз: Ки бовор мисоху этуь? Чуь шовгІо доре?

Шолум: Гоф мердини.

Алхаз: Белки угьоре кук нисе бире, белки гьеме духдоргьо мибу?

Шолум (*Терсирере хуно*): Дур гердо, дур гердо, бур сестуэре. Гьич эз пире хэре лэгIэйтуь е-дуь хошие гоф нисе ведироморе. Гьери веги. Сер гирдим. Те себэхь бире дуь-се сэгIэтле мунди. ТэгIди сох.

Кор сохденуьт. Товуш муьрдени. Себэхмундеи. Оморени г
Гуьли ве Иричке. Э ишуревоз Салман ве Ирмигьо. Вокурденуьт килите. Эз омбор ведироморенуьт гьэземетигьо .

Алхаз: Э Иричке, туь нетерсири э меревоз гьижире кор эри сохде? И чуй мэхсерей? Эзечуй ме гьэдерсуьз фэхьлее одоми мибошумки.

Иричке: Туь гуьрг енебуге аслани бегем эз туь эри терсире?

Алхаз: Мере э хэйвуревоз эдей той сохде. Бошку, сес нисохум, терси ненге эгене э гьэземет мидешенуьт. Гьемме шоробгьоре михурдимге?

Шолум: Э Гуьли, туьре номус гьисди? Туьре гIэйб нисе оморэ э меревоз ижире беде зарафет сохдей туь?

Гуьли: Гьемише туь зарафет нисохики. Е гиле эймеш гIэмел миёв. Енебуге у профессор эз кортуь фурмуш бири? Ененге орденуьт те имогьоиш э игиде синейтуь веноре не омори?

Алхаз: Жилид зерейм.

Шолум: Эз хиники муьрдейм.

Салман: Биригьо бири, имогьой гьердуьшму э зиедиревоз эгьуьлменд мибошит. Эчуьниге мере э и шегьер кориш нимуну.

Шолум: Егиле зигьисденим э и Гуьлом.

Салман: Гьелбетте. Унегуьре диеш гIэсуьллу бие бошим.

Алхаз: Э киревоз нис бире? Гьэлет сохдейм. **Салман:** Э зенгьошму согьбоши гуит. Угьо ишмуре эз герексуьзе рэхь поюндет, э хубе жире чарундет.

Ирмигьо: Имогьой динж поит. Эме председатель гьэдэгьэ зерёбу: э е орине варастге и дуь хьэрмэхь омбор шоробире, э угьо премиеш доре, путевкеш э Масков, э выставка.

Шолум (*вегирдени сэхд сохде конверте*): Омбар согьбоши.

Алхаз: Эз иму дие олхоин бошит. Иму э тэхьной шороб гьич нихурим. Еки шенд – хьисоб сохит, гьердуй шенди у жегьендемире ичкуре. Э гьеммей пулгьой гЪуьломевоозиш дие е дугьйш те невегьоре дире, шор бире.

Шолум: Те гЪилгьоймуре суьфдеи кук бире. Алхаз: Кук гьелем бистоге. Бистоге гьемме духдергьо?

Шолум: Дур гердо, дур гердо.

Гуьли: Э профессор, э Шолум, туь э хуне нисе оморе?

Шолум: Чутьам неем, ежире хов дери мере, гуйге гьич э гЪуьмуьрмеш серме э болуш, жендекме э хьэлов не расири. Э Алхаз, ме бурам э хуне, е тикеш нуш хурум, те пишней михисуьм. Эз пишней бэгьдо имуре екем кор мунди э инжо. Мере гьейсэгЪэт гьувот эн у келе пичикегьоре гьуьл додоре нисди, туьш екем хэстеи туьре веги, бирорме.

Алхаз: Туь, Иричке, мере э хуне деиштени? Ненге бэхшлемиш не сохдей мере? Гу, э шугьэмтуь гьэйре гьич медеил.

Иричке: Бошгу дие, и шите гофлогьоре мегу, туь той эни хуьрде корлегьо нисди, зелей туьреш инжимиш месох э неогьи.

Алхаз: Эле, чутьам инжимиш сохум ме туьре. Мере гьеммей эни хэлгьэ хуно нуьгь-дегь зе нисдики. Гьисдигьо-нисдигьо е туьллей. Эрчуь бисто эгене бие э рэхь бурам э туьревоз.

Иричке: Имогьой варасири? Ненге э тэхьной мимунни, зесуьз. Е дуьлхошие гофеш екиш нигую этуь, парталтуьреш нишуру, е бишгьоб чиш нидуь э вэгЪодою.

Шолум: Э ховир милиционир, нумтуь эйме оморенигьо Салмани, биэ э хунейму э гьуногьлуьги, е лугьэ нун себэхьмундеире хурим.

Алхаз: Эчуйниге туь, Ирмигьо, биэ экиму, туьре гьуногьлуьги сохим.

Ирмигьо: НэгЪи, мере гьелем гьуллугьгьойи э инжо. Эри хэлгь ихдилот пестейнере бие сохум. Омбар согьбоши.

Гьеммейки рафденуьт. Ирмигьо ведироморени э пушой сегьне.

Пестеине (Эпилог)

Ирмигъо: Гирошд се сал. Шор рафдуът хьэрмэхгъо э выс-тавка э Москов. Оморенге эз унжо эри гьемейки хэйли бэхшгъо овурдут. Эмеш раси е раче ейлугъ ве е жуьфт наски. Зегъошуш э вогошдеи шуьвергъо лап дениширет, эз пестеине коргъошуш рази бирет. Гуйге Шолум не гуфдиребу у гофгъоре, гуйге е гГемелдане фолчи э гГов денишири гуфдири, чуй мибуге. Эри хубе, зарблuye жофо Шолуме орден дори хуькуьметиму. Эз пенж-шеш мегъиге председатель колхоз рафди эри кор сохде э е жигейге. Гьеммей хэлгъ песте вихди э жигей эню Алхазе. Сеимуьн гофиш гьебирден дуз ведиромо: э хуней Шолум омори профессор эз келе шегьер, эже Пинхас тербие гирошдиге. Расди угъо шороб-эрагъи не хурдет, оммо профессоре лап хуб гъуногъ сохдет. У е шев э омбор домундеи эри жунсогъи эн дуь хьэрмэхъ лап герек бисто. Эзумбэгъдо угъо э лой шороб дениширеш нисе дениширенуът, буйлеш нисе кеширенуът, эзечуь угъоре лап хубе духдиргъош хилос нисохд, чуьтам эз дес зегъошу веромоге. Э и се сал не бири е рузлеш, угъо экиме э чойхуне неев. Себэхъмунде зу эз гьеммей эни хэлгъ вокурденуът угъо дер чойхунере, тэхъти сохде-сохде хурденуът э еки е чойник чое. Гилейге оморенуът угъо э жиге корме, руз кори варасденге. Нуьшденуът дуьимуьн гиле э куьнди е сэ-гГэт, э хэлгъэвоз эширине суьгъбетиш сохденуът, чоеш э лезетевоз хурденуът. Ме э гГэили э чойхуне кор сохденуьм, кидан бист салиш мибуге. Э и бисд сал ме гьемме жире одомигъоре дирем. Гьеркире е хосиети. Екире тухе чой хьэз оmore, мугуи э пушойю э сер истул пейлей коньяки. Екийге хосдени лап очугъэ чой, зерде гГовлере хуно. Гъэдуьр эн дусди эни дуь мерде ме лап хуб дануьсденуьм э и се сал. Чуй еки сохдге, гье уре екийгеш мисоху. Эз е чойник хурденуът, гуйге эз е куьф, бэхше не сохде, хэржи сохденуът. Мереш мие бире ужире хьовир, зарал нисохдум. Эз угъо э жигей келеи Шолуми. Оммо э песой хьэрмэхъ хуьшде мирав э гГовиш, э гГэтошиш. Хундеи варасде, вогошд э хуне Пинхас.

У бисдо келеи агроном эн колхоз, э гЭрей хэлгь хуърметию лап келеи. Марго и салгьо денишири энумгир хуьшде. Ченд илчигьо не диремо эки бебешу, гьеммере пиш сохди, э екиш эз Пинхас бэггэй рази не бисдо. Мереш огол зеребу э у шоре гЭрси. Шоробиш хурдем, вежеистеш вежеистем те офдоре эзир истул, суьст бире. Имбуруз эри гьердуь кифлет исд лап энтиггэе руз: игьоре гЭил бири. Ме шиновусдем, духдер бири гуфдире. Имогьой Шолум чуй мигую, эхи у гоф дори: те кук бире жоилгьоре, у е дугь шоробиш хурдени нисди. Оммо те имогьой гоф хуьшдере гирди, Алхазиш э у гуьре сабур сохди.

Э сегьне ведироморени Алхаз ве Иричке, Шолум ве Гуьли. Э миглешу эдее рафде Пинхас э гЭилевоз э десгьо, э кинию Маргош.

Алхаз: Э Шолум, и чуй кори омори э сер иму? Эз зугьунтуь ки кешири эри гуфдире у гофе: гоф мердини – нихурум (*сохдени эз зугьуншу*).

Шолум: Туь чуй хунде, Алхаз, мере миест бире дердгьойтуь. Э хэпер меш нисди, туь мунош. Небистоге, те муьрдеш нихурум – зарал нисохум.

Алхаз (*ох кеширени*): Эчуйбуге меш э туьревоз.

Шолум: Дениш, чумлегьой гЭил эн мере хунои.

Алхаз: Туь чумгьойтуьре эзже дире, негуи зимуш?

Шолум: Нехогьойтуь гьич э гузги неденишири бегем? Ненге терсирени, денишириге, у дуразе беденишонее винитуьре мивини гуфдире?

Алхаз: Эле, виниме е минжиггьлеики, эн и балалере хуно. Гуьли: Неогь хьижет месохит, гЭил э дедейхуьшде омори. Гуйге сирот эн Марголеи. Ишму чуйтам нисе диренит?

Иричке: Муйлогьо ю эн Пинхасе хунои, сифотлеш ужире сипини.

Ирмигьо: Эки ухшеш зеренигеш, эри гьемме амбарек бу, екишмуш э инжо, э и шоре руз кес нисдит. Дузи? Гьеме э еки:

Согъбоши. Эз гІэилгьойтуьш винош. Дуьзи, аззи. (Эдее хунде-
нуйт):

Мозол инсон, шори инсон,
О, чуйкле бала.
Чуьшмеи туь эн гьеминон,
О, теке бала .
Дуьл эн дедере месох хьэл,
Бош эгъуьлменд, бала.
Чумгьойтуь мимуну темиз,
Офдуьми туь, бала.
Эри бебе бирей азиз,
Мун тевесер, бала,
Ой, чуйкле бала, азизе бала,
Товуш эн дуьлиму, бала.

П е р д е .

Ш Е Ф Д И

Пьеса эз 10 шекуьл

Бэхш вегирденигьо сифотгьо:

Девер – бистсале кук, студент

Мунош – бебей ю, колхозчи, шастсале

Мержо – дедей Девер, пенжосале

Томор – шаздесале духдер, эри духдири хунде

Одом – колхозчи, хьэрмэхь Мунош, шастсале

Сефер, – хьэгьергили Томор, бистсале

Динор ве **Тейло** – духдэргьо, хунденигьо э Томоревоз

Исай ве **Борух** – хьэрмэхьгьой эн Девер

Серпои э **ресторан**

Рушверие келемерд

Библиотекарь – жогьиле духдер

Маня – хьэгьергили эн библиотекарь

Екимуьн шекуьл.

Богъчелей шегьер. Дух-се дори, гуьльо, гиев. Э скамейке нуьшди келемерд э сипре муйгьой серевоз, рушвери, эдее гозит хунде, э иловлеш нисе денишире. Э пушой сегьне ведироморени Девер. Э тению назук ,гуьлкутэхьэ шеи, сие шовол, пойвокугьой гьеминони. Э расди десио дери раче, зерде гьузургьуьл. Рэхь рафде-рафде, эдее э ниетевоз гуьле буй кешире, ловгьойю э хэнде фарафде. Поисдени.

Девер: Чухтам гьовой асму дегиш бирениге, гьезечух гьовоймеш дегиш бири имбуруз. Е сэг'этле нисе диренуьмге духдере эн дуьл, эн ниетме, серсоне хуно, делуь хуно биренуьм

рафде. Оммо чуйтам у экиме те гьиемет пою, муну эхи гьельем не зенме, не Гярусьме нисди у. Оммо егьин мибу... (*Буй кеширени гуьле. Ох кеширени эз биней дуьл*). Руз пишнеи эдее бире. Кей мивохуру Томор эме, руй-сифоти юре мивинуьм, чумгююре э тур эн сухденигьо эз муьгьбет дуьлмеревоз мигируьм? Ки дануьсде? Ки мидануь жогьоб доре мере? (*Домундени гуйге э дугьонде фикир*). Эз расдекиш, чуйни гьисмет эн инсон? И гофе гьеммейки дануьсденуьт, оммо бинелуье мэгІно юре ки бегьем, буьтуьн варасирени? Пире мердгьо э худо, э гофгьой Туро бовор сохденуьтгьо, гуфдиренуьтки мозол ве гяжел инсонет ве гьер одоми э сер булутгьой асму нуьвусьде оморенуьт. Оммо боже-хьэт. Енебуге ки у гьисмете эз руй асму хунди, эри тэхное сер хуьшде семе дузе жире песеде сохди, шор бири. Не бири гьелелуьге ужире!... (*Дениширени э зверсер хуьшде, гуйге асму-ре дире*). О, гьисметме!О, муьгьбетме!Чуй мибу себэхь...!?

Келемерд: Мурдалгьо! Гьуругьсевенгьо! Хьэремзедегьо! Чуйтам хори гирде, тоб доре ишмуре!?

Девер (*чарусдени эки келемерд э гьэйревоз*): Леле, ишму э меревозит? Чуй сохдем ме бегем?

Келемерд (*Серэ эз гозит ово гирдени, дирени Девере*): Чуйтам? Эричуй кор эхи? Бэхшлемиши хосденуьм, хэлефме, и хьэрой-нифрима эй и эи гозит хундемгьо мурдале коргьои.

Девер: (*э хэндеревоз, э хуьшде оморере хуно*): Эле, ме терсируьм эхи. Гьэйгьу нибу, э меревоз эзечуй бирени, е ченд гиле киниге хундеки, деде-бебере э нехэберие хэндеревоз терсуьндем. Кидан, лап бедемугІуьжуйзе коргьо нуьвусьде омори э унжо, э ишму хунденитгьо гозит. Неогь хьэрой ни дешендит...

Келемерд: Ченд сал зигьисденуьм э Гуьлом, бебей эн келе кифлет, невегьо-нишрегьош гьисдуьм, эгене э бедхьисобе коревоз рази бире нисе дануьсденуьм.

Девер: Чуйтами сергофи энун статья? Меш михунум.

Келемерд: Сергофиш лап бидэгІэт оmore эрима: "Гьисмет."

Девер (*Гуйге э сер ю асму офдори, жуьмуьсдени*): Чуйтам?

Келемерд: Эримеш ежире омо, чуьнки меш у гофе э соки-тиревоз шиновусде нисе дануьсденуьм. Салгьойме амбари, пушой эз гӀуьлом рафдей мени. Эзутовне э сереботи гьисметме ве гьисмет эн гӀэилгьойме дуразе шевгьо фикир сохденуьм...

Девер (*Гуйге э хуьшдеревоз*): Гисмет? Эз товун чуь бие бу у статья? Зурбое кори. ГьейсэгӀэтинэ хэелгьоймени...

Келемерд: Дануьсде воисдениге туьре, гуьом. Е кук ве е духдер эдембируьт гӀэруьс ве домор бире. Расди, угьо гьердуй эз дуьли дуь эн еки бируьт, эз зуревоз шинохдембируьт дуь-екире. Оммо бебе-дедешу э пэхьники игьрол сохдуьт эри духдер келе рэхь доре омо се гьозор монетгьо пул, дуь гусбенд ве чигьойге. У коре дануьсденге, духдер омбор гьэир кеши, минет сохд э бебею: ше у куьгьне гьэдотгьоре, бебе! Ме бегем гӀэсбуьм, туь мере эдее фурухде. Эри муьгьбетме пул вегирде? Оммо у э гофгьой гӀэил не дениши, сие кор хуьшдере сохд. Не ветовусд духдер э у мурдале доре-восдоре, хурд огьу, э гьэриш дуь сэгӀэт муьрд. Расирени и хэбер э кук, домор ю. У эз келе бедмозоли муьгьбет хуьшде сэхд нечогь бисдо, эз эгьуьл хэреб... Песде тэхсиркоре э гьэземет дешендуьт. Дузи, бесгьуни доригеш зобунире, шефдире, эгене муьрдере диеш зинде нисохи, дие ме бурам, э ме э хуне лап дениширет. (*Рафдени*).

Девер поисдени гьезечуь, гуйге э пушой чумгьой ю гунле пар зери гиросде. Хэйли вэгӀдо сес нисе ведироморе эзу.

Девер: И гофгьоре неогь шиновусдем ме димбедуз э у туьтем, кейки хэелгьо-фикиргьоймеш эз товун гьисмете ве Томор э сер ме оморет. Лап терсиренуьм меш. Михою эриме ер мере? Чуьтам гӀэруьсиме мигирору? Куьгьне гӀэдотгьоре бебеймеш нисе шенде. Чуь сохде гереки? Ки весиет мидуь мере э и четине мэхьэл? (*Поисдени екем*). Э-э, у песединэ кори. ГьейсэгӀэт вэхд эн ужире фикиргьо нисди (*Э хэндеревоз*). Чуь хэруьм ме! Гьелем э Томоревоз бегьем шинох нисдуьм, дегь гофиш дуь эеки не гуьфдирейм, оммо ниетгьо мере гьэдерсуьз дур бердет. Зигьисде

гереки. Э дуйшгьой одоми сер вериге, тие туп нисдиге, рэхьэ рафде гьемише мибу. (Эз десию гуьл офдорени, у нисе доре э у кор мэгІно, пое э чекмеревоз э сер гуьл норе). Томориш не вохурди э ме, эз хьэрмэхгьойме екиш веди нисди. Бурам, гещдуьм угьоре (Рафдени).

Дуьимуьн шекуьл

Кучей шегьери. Етэбэгьэ хунеи э дуй ковре пенжеревоз. Э гьер лой дуй куьнж хуне дуй дор поисдет. Э пушой сегьне эз фонар эдее товуш офдоре, рангию екем гьирмизини. Эз дури эдее сес гитара ве мэгІни жогьиле сес мерди оmore:

Дуьлме, хосденуьм,
Месох тенги.
Э иловлейме
Сад астарাগьои.
Мебур товуше –
Лап раче менги.
Мезе гьопозе
Эз серме, гуьлом.
Не офдум ере.
Гуит: текей?
Ме бедмозолум
Э тэхьнои.
Гене шевгьойме
Бисдорут торик.
Мебош пэхьни,
Бедхьисобе гуьзел.

Эз елойге э куьнди оморени сес шоре хэнде. Э сегьне ведироморенуьт Исай ве Борух.

Борух: Ме ведешенденге эз куьф тозе пенжмонетире, гьелбегьел сифот ю дегиш бисдо... "Эже гереки ишмуре рафде, гІэзизе

хьовир, – гуфди кассир, – тэг!ди сохде-сохде. – Э коми руз. Э коми сэг!эт? Э Москов, персебэхь, руз пишнеи? Бошиста! Ини билет ишму. Рэхь ишму ник, шор рафде, шор биевошит. Омбар согъбоши! Гьергой герек бисдо гене – э сер дуй чум ме...

Исай: Дузире гуом, лап келе, гъэдерсуьзе гъувот де э пул. Гуйге бигГилегъо, когъозлегъои – оммо...

Борух: БигГилегъо?! Туьре герек не бисдоге, енебуге зиединиге – гьердуй куьфме хьозури – биер, хьовир...!

Исай: Негуи э ме, Девере, хьэрмэхьимуре, эз пул эзгьечуй, имуре хуно, эз пул хьэз оморени? Эриме оморенигъо, нэг! Не зиедие шороб-эрэгъи хуру, кейф соху... Туь семе хуб варасирени, чуй одоминиге у? Ченд сал э г!эрейму дусди-шолумини, эз серме нисе вадарафде...

Борух (*Е жире денигирени э сифот Исай*): Сургъой энуй, дуьлестигъо ве ниетгъою э сифотию очугъи – туь те имогъоиш нисе дануьсде?

Исай (*Мэхьтел бирере хуно*): Сургъою? Чуй сур бире, Худо мееро, одомире эз хьэрмэхь, эн гьердуйму мере гьич хюбер нисди. Дануьсдениге, гу э меш.

Борух: Ни фурухи мере? Песде э вихдей серсоне хуно ошугъ бире одоми ки вероморе?

Исай: Ошугъ бире? Серсоне хуно? Тозе овосунегъои!

Борух: Эле эз расдекиш, э у коргъо неде! Туь Томоре эз медицински училише шинохди? Е жогъиле, гуькчеке духдери. Деде-бебеш нисди уре. Э детдомиге. Э интернатиге келе бири, етими эз девр довг!о. Шинохди? Девер хьэрмэхь иму эз дерд уре хосдеи эдее муьрде, хьэл бире. Сифотиюш зим-зерд бири, чумгъоюш дуй келе астарере хуно эдее сухденуьт. Лап дегиш бири. Дануьсди биней коре? Сес месох, ненге мере хьэриф энуй нисди.

Исай: Эле, туь ингъэдер мэхьэл сес не сохдей, не гуфдирей э меш? Гуйге чумгъоиме кур бу, имогъой товуш винирем, э дуде рэхь ведироморем. Ижирей коргъо? Дениш ебо, гьич нигуфдурум Девер гьечуй лугъонд, тобсуьз ошугъ биренигъо одомини гуфдире. Оммо имогъой эдее диренуьм: дузи гофгъойтуь.

Борух: Гофгьойме дуз гьисдуйтгеш, ме диренге, чуйтам хьэр-мэхь иму э мунутию е гиле ох кешире, садбо э рузию гуйге э хуьшдеревоз гуфдирени: эжеи туь ерме, пезде нехэбереки нум Томоре гирдени, войнесуьз хэндуйсдени енебуге эз чумгьою гЭрсгьо рихде – диренге и, э чуй имунигьо мердгьо нисе гуьн-жуьсденигьо шите корлегьо дери, мере хэндеш гирдени, оммо гьэйриш оморени.

Исай: Рэхьмет э хурде ширтуь. Ме де уре эз руьхшенди-гьойме нийлуьм.

Борух: Е кор не сохде, ни поим, чуйнки зарафет не бисдоге э гуьлом, э гЭрей хьовир-хьэрмэхь, зигьисдеш герек нисди... Пой-о, кини оморенигьо? Эле дануьсдуьм. Туьре воисдени дире у духдере, э комики бирор иму гуйге Меджнун э Лейли ошугь бири? Э у жегьендемие винихуьлмие духделе Томор дие! Уни эдей оmore. Бие дуьндуьрмиш сохим...

Исай: Белки герек нисди? Э вихьдей Девер ки вероморе пезде, хэбер расиге э у? Бие мугьоет бошим!

Борух: Метерс, ме э туьревоюм.

Исай: Бошку, лап терсенгьо нисдуьм ме, зиедие гоф мегу. Екем зарафет мисохим, хэлгьошуреш миданим .

Э сегьне ведироморени Томор.

Томор: Эжеи те гьониш хэгьергилигьойме? Имид дорет сэгЭт хьофди э инжо мивохурут э ме. *(Дениширени э сэгЭт гьули)*. Нимей хьэшд эдее бире. *(Дирени жовоне кукгьоре, чарусдени э е лойге)*,

Исай *(евошлей)*: ГЭйбкеши, мермекином эрию.

Борух *(э у гьуре)*: Э серсоневоз дуь эз еки нидомунут.

Исай: Чуй офди э и у харе хьэрмэхьтуь *(Э хуьшде: Зурбо раче духдери, чум жэгьендеми чи варасирени)*:

Борух: У серсон туьре бугу. Оммо туь офдей жигей юре. Э мейму ухшеш зере *(Эй хуьшде: туь мунош эзу расди э вечехаре Девер, бирортуьревоз)*:

Исай: Эри сер ги, бурмун гьинорменди туьре.

Борух: Дуьлпесо мебош, ме пес нимунум.

Исай: Дие гьогъэ хуно эйчуь поисдей?

Борух (*Чоресуьзи*): Бэхшлемиш сох, хэгьер (*Евошлей оморени куьнд эз Томор*).

Томор (*Мэхьтел бире*): Ишму э меревозит?

Борух (*Э дургуне мигьровуниревоз*): Туь эз кигьои хэлефме? Нумгьой келетегьошмуре ме нисе дануьсденуьм?

Томор (*Э хуьшдеревоз*): Ю гуйге лап келе мерди! Кидан, руьхшенди сохде э ме! Оммо чуьтам жогьоб недуьм, эхи зобуне гоф не гуфдири (*Сифотию эз гьэйбкеши гьирмизи бире, оммо жогьоб дорени*) Ишмуре э меревоз гьуллаугьы?

Борух (*Гьизмиш бирере хуно*): НэгI, чуь гьуллаугь бие бу мере э туьревоз?! Эдем гирошде тозе онгуре хуно. Туьрш-мезе...

Томор (*Э гьэйревоз, гуйге эю синле зере омори*): Ишмуре э меревоз чуь кори? Бигьилит мере э динжиме! Чуь ихдиери ишмуре э ме мешет бире, эз куче гирошдеш нисе бире.

Борух (*Хэндуьсдени мурдале жире*): Онгуре э вэхдию не хурдиге, тиршов мизенуь... Ха-ха-ха...

Исай (*Варасирени чуьниге, екем пешмуре хуно*): Э Борух, ве-си дие, зарафетгьойтуь нисе варасде эхи... Имуре рафде гереки...

Томор: Чуь гуфдиренит ишму! Мурдал! (*Видовусдени рафде эз вегьне*).

Исай: Чуь гуфдири туь э у, хэр? У эри чуь гирисдебу? Туь чуь сохдей? Белки у и дири-зуи зен эн куьнде хьэрмэхьтуь мибу. Туь бегем муьвэхьтуьре вир сохдей?

Борух (*Дуьл дорени хуьшдере, оммо серию э жиге оморенге, варасирени гьэлет биреи хуьшдере*): Э, э хэпермеш нисди. Эвельминжи, бегем мерд чуь Девери ве ме гьич э хотур гьэруьс хуьшде эз хьэрмэхь хуьшде дес нивегинуь? Дуьбореминжи, кук э духдеревоз эгьуьлтиже зарафет несохдге, зиндегуниму эри чуьни? (*Поисдени гуйге э хуьшде омори. Евошлей*): Эз расдекиш чуь сохдуьм ме? Мере и кор эричуь герек бу? Э, Исай, мере садан фирмунди. Ме бегем Девере гьич нисе шинохденуьм?

Лоле шекуыл. Бору поисди э пушой томоше сохденуыгьо одомигьо, десгьоре э гьердуй логь шенде. Э сифотию мэхьтели ведини. Исай гьердуй десе э лойю гирди, гуйге эдее серкуш зере.

Сеимумн перде.

Гъэд хунеи. Э гьер лой утогъ тэхд не дивони. Э минжи шилхьон не куърсигьои. Э сер шильхтон бишгьоб э емушьеревози. Э песо ишкоби э рафле-сэгІэти. Мержо эдее хорире жару зере. Э сер тэхд Мунош дегешди, э кулию назуке одиели.

Мунош (*хэбер бирени, нуьшдени э сер тэхд. Пойгьоре э зофру фушенде*): И чуй жегьендегьемие ховгьо диренуым ме шеве руз? Кукме Девер, офдумлейму. Раче духдер, э тикме ухшеш зере. Оммо ме уре, э жун Худо, гьич не дирем. Товуш. Бидэгъэти. Песде э ебо хьэрой, шивен, сес гирье. Чумгьой Девер гьэриш бирере хуно. Зенме гьолок, сес бури, гуйге лол бирем...

Мержо (*поисди э миглей хуне. Эдее гуш веноре, э десию жару де, кемерию гьэди эз хэсдеи*): Э шуьвер, туь чуй хунде? Гуйге вэгІдой нумазиш нисди, эгене гофгьоюреш варасире нисе бире. Чуй омори э ховтуь?

Мунош: Эле туь э хуне де? (*гуш венорени э гофгьой зе, песде э ело*). Хубчи не шиновусди, фэгьир Худо! (*Э зеревоз*): Текей кор сохде? Нечогьи туь эхи! Э хуьшде езугь нисе оморе туьре?

Мержо: Чуй сохум ме? Эз э ежиге нуьшде-дегешде, ки сирои бири? Гьэйгьу нисди, э и е-дуй мегь жовоне зе мидебу э хунейму. Кумек мибу э и пире салгьойму. Эри туь чуйтам оморе?

Мунош: Худо мебуру, кукиму мерд бири. Е шефде кор, е гІэйбе жиге неде э гІэилиму – у келегедимуни. Оммо тэгІди нисди. Имогьой кукгьой хэлгьи у ишу хуьшденишу вихденуьт духдере. ВэгІдо мибу у, Девер, миев мигую: хойт эриме бурмунуме духдере...

Мержо: Туь чуй хунде? И гофгьойтуь эдее дуьлмере буррануьт! Чуй ихдиери уре ужире бедхисобе кор эри сохде, биебури оворде э сер сипре сертуь? Ме миофум эрию духдере, дес ве чум кес не расире шофтолуь богъэ хуно мибу у. Песде бебе-дедеюш эз бэхдевере хубе одомигьо бу. Эхи имуреш гъувот эн кшьо герек мибу, мозол ишу имуреш зиндегунимереш товуш мидуь. НэгI, чуйтам келетегьой туь, бебегьойму сохдиге, иму эзечуй бие сохим. Енебуге ме эз биебури, эз гъэйр хуьшдере э нефд батмиш мисохум, мисухунум (*гиристени*). Э гIил семе у инсофсуьзе тэхьэргьоре мегу ...

Мунош: Туьре чуй бири? Эри чуй гирье сохде э и динже хуне? Элем кор гIэруьси нисдики.

Сес дер куде оmore. Диреморенуьт Сефер ве Томор. Э дес Сефер боможник э хуьрде пулевози. Э дес Томор э гъуногьлугьги огол зеренигьо когъозгьои.

Сефер: Руз ишму эхэйрбу! Эри небирогоргьошмуш гердо! Фердешев э хунейму миейт э хосдеи хэгьерме.

Мунош: Мозоллу гердо!

Мержо: Тевесер зигьо э одохлуй хуьшдеревоз, хэлефме! Чуй хэбери эз хунеигьошму? И духдер кини э туьревоз?

Сефер: Хэгьергилимени. Нумию Томори. Шинох бошит.

Мержо: Ме, кидан, келетегьойтуьре нисе шинохденуьм...

Томор: Божэхьэт, холе. Ме э детдом келе бирем.

Диреморени эз дорну хуне Девер. Томор нисе дире уре.

Мержо: Фэгьир Худо! Чуйтам гьечи?

Томор: Э ме гуфдирет э гIэили, гуйге бебейме э довгIо мунди, гуйге э у келе игиди бирмунди э Германия, хэлгь эн угьоре хилос сохдеки. Гуйге дедейме э дуь мегь муьрди-варасди эз дуьлести. Ме сифот эн угьоре не дирем.

Девер: Руз ишму эхэйрбу. Бэхшлемиш мисохит, мешет биремге э ишму.

Гьемейки чаруьсденуьт э лой ю. Томор диренге жовоне куке екем песово дорени хуьшдере, гуйге эз терс нехэбереки бирей.

Мержо: Кукме. Э э ертуь мунди Сефер? Э эхири курс институт гирошди Девер иму. Э Москов совод вегирде.

Эз куче оморени сес мэгИни:

Дедейме, дедейме, мефурух мере,
Ме терсиренуьм эз у домор.
Хубчи мизери, буррири и сере:
Э дуьлме огъуни, нумме – Томор.
Дур бош, бирорме, эз и одохлуйме,
Нибу эритуь дуьруьсде хьэрмэхь,
Хубчи дедейме нишенд и туме,
Нисохд эри кук ю зиезде темэхь.
Тик сох, куклей ме, дуразе хэнжеле,
Ини дуьшментуь, зе эз шугъэм...
Бедхьисобини, ме вихуьм гIэжеле,
Нисди женнет, бурам э жаандем.

Мержо: Хележигер гердо хундегор. Кидан, эгене гьэрише зен шегьер эз делухуьне ведиромори.

Мунош: Мегу дие. Нечогъини. Гьичиш сохде нибу.

Томор ве Девер те и туьтем мэгИниреш не шиновусдет, эз жиге не жуьмуьсде, дуь э чумгьой еки дениширет.

Томор (*Гуйге эз хов хэбер бири*): Чуь? (*Оморени э хуьшде*).
Вегинит, холе. Согьбошит. (*Зу, э тэгIдиревоз ведироморени*).

Девер е жире поисди, гуйге юре воисдени э песой Томор вирихде. Песде тоб дорени, чарусдени, дарафдени э дорну хуне. Гьеммейки дениширенуът суьфде э лой Томор, песде э лой Девер. Мунош жумундени сере э суьпле хэндеревоз. Зению энгуьшде гЭнж гирде. Сефер чумгьоре э хори фушенди, гьогьэ хуно эз жиге нисе жуьмуьсде.

Чоруьмуьн шекуьл.

Чуьл-пелесей шегьери. Э иловле савзе гиеви ве дуь-се дори, гуьлгьо эдее хушбуй доренуът. Буьлдурчин эдее мЭГни хуьшдере хунде. Э дури ведини ковре догьгьо. Девер нуьшди э сер гиев.

Девер: Э духдергьоревоз ме омбар дусди сохдем, чуьтам бирор э хэгьоревоз дусди сохдениге. Гьич те имогьой темэхьиш не омори мере, дануьсдеш нисе дануьсденуьм, чуьнуьтге десгьо ве ловгьой ер. Чуь зурбое гЭтош дегеси э дуьлме, ме туьре суьфдеи гиле диренге, Томор! Ки дори туьре ижире жовогьиле чумгьо ве балай жейрони? Э коми бэхдевер мираси туь, мере те гьиемет бэдмозол сохде? Ки жогьоб мидуь э и чоресуьзе пуьрсуьшгьойме?

Эз биней сегьне оморени сес хэнде. Веди биренуьт се духдер: Томор, Динор ве Тейло, гьерсешуь шуш нефес гирде.

Динор: Духдергьо, веси видо-видов сохдеймгьо. Дие мере эри хэндуьсдеш гьувот не мунди.

Тейло: Чуь рачи инжо – гуьлгьо, буьлдурчин... Оммо ки имуре имбуруз эз училище эз нубогьо вирихунди? Иш динже Томори, гьич эз гоф келегьо нисе ведиреморонигьо. Эгенеш хуб жигею сохдейм. Е и темизе, соките эвир эн мерж э гьемме книггьой гИьлом миверзуь...

Томор: Меш нисе дануьсденуьм, чуь омориге имбуруз э серме. Гуйге пэхьникие сес огол зери мере, гуьфди: бегем туь гьич

мозолтууре шенде ниофи?... Чув рач, очугъ вединуыт э инжо дорго – кип-кову, гуйге дерго ве асмуре хуно. Гьезечув дениширенге э угьо, гьозор ниет оморе э дуылме, дув эз еки шори у ниетго... (*Дирени Девере*). Ой, ме и куке эже дирем? Э и куындигьо? (*Э ер овурдени*). Э хундогу дарафдеки.

Девер (*Сесию лерзирени*): Руз ишму эхэйрбу!

Динор: Руз ишмуш эхэйрбу! Ме ишмуре хуб шинохденуым, ишму кук эн лелелей Муношит, э Москов хунденит.

Девер: Эри. Дузи.

Тейло: Ме гьич хуышдениме э Москов не бирем, чендгэдер книг хундемгеш, киногьош диремге эз товун ю. Ниетмени э унжо е гиле семе рафде. Имшуре хьэз оморени эз унжо бире?

Девер: Эри. Дузи (*чумгьоре нис вегирде эз сифот эн Томор Духдериш гофсуыз денишири э Девер.*)

Тейло: Туь гьич не рафдей э Москов, Томор?

Томор: Эри. Дузи.

Динор чуйниге варасирени, евошлей гирдени Тейлоре эз гьул. Ведироморенуыт эз сегьне.

Томор (*оморени э хуышде*): Ой, духдерго эжи? Мере шендет, рафдет эжеиге. Бурам гешдуым угьоре (*оммо эз жигей хуышде нисе жуьмуьсде*).

Девер: Поит екем.

Томор: Кидан, мере фурмуш сохдет, шендет. Бурам зу э угьо эри расире.

Девер: Поит екем.

Эз е лойгей сегьне ведироморенуыт Исай ве Борух. Гуйге сие булут гирдени нимей асмуре, товуше буш сохде.

Борух: Эле, вохурдет эхир дув э екиревоз ковтерлего. Евош, сес месох, имуре нисе диренуыт. Бие пэхьни бошим, денишим (*Дарафденуыт э песой дор*).

Томор: Чув хъэлегигер бисдорум ме. Гъово дегиш бисдо. Чувшмеш веди нисди дие, буылдурчиниш дие нис хунде.

Девер: Метерсит. Чув терс бие бу ишмуре? Гъового эзечи дегиш биренут: гъейсэг! Эт воруши, эз е мунутиге дирени – эгене офдоини. *(Э е лойге)* Оммо эймеш ужире омо. *(Э Томор):* Ишму мере дирейт егиле э хундогу дарафдеки, оммо ме ишмуре ченд гиле дирем, э ерме хуб мунди.

Томор *(очмиш бирере хуно):* Эри? Дузи гофгъошму? *(Э думит домунде екем).* Ой э ермеш эдее оmore имогъой. Чендгиле вохурдейм иму э еки – э куче, э хунденумгъо жиге, э туку... Эхи чумгъошмуре фурмуш сохде нибу, савзе г! ов деръегъоре хуноют.

Девер: Эз гофме гъэйри бисдоритгеш, ме э ишму э гъэсдевоз вохурдем. Мере эз зуревоз воисдембу э ишмуревоз гоф сохде, шинох бире. Войгёойме темизуът.

Томор *(сессию лерзирени):* Ме бовор сохденуъм. *(Е хэйли сес нисе сохденуът).* Э хъисобевоз воруш миев, мере рафде гереки э шегьер.

Девер *(э муъгъбетевоз):* Рэхъмеш э улои. *(Рафденуът).*

Борух ве Исай ведироморенуът эз песой дор.

Борух: Зурбое кори. Е гофлешуш э гушме не расири. Белки кар бирем.

Исай: Нэг! кар не бирей. Меш гъичиш не варасрем.

Борух: Эле, и кини? Тейло? *(Э Исай):* Ме и духдере лап хуб, очугъ шинохденуъм. *(Лап мурдале жире хэндуюсдени).* Эй Тейло, ишму чув сохденит э инжо месуъз?

Э сегъне ведироморенуът Динор ве Тейло.

Тейло *(э гъэйревоз):* И чув хэре хъэрои? Туъ жингир бирей!?

Динор: Ишму не дирейт, эже рафдиге е жоиле раче духдер, тойму э гъирмизине булширевоз? *(Исае воисдени жогъоб доре, Борух нисе гъишде),*

Борух: Ишму эри энү духдер эйчүь гыч дуьлпесо мебошит. У кор хуьшдере лап хуб дануьсде, мозол хуьшдере ужире духдергьо пой зере негирорут.

Динор: Ишму чүь гуфдиренит? ГІэйб биевгу ишмуре!

Динор ве Тейло рафденуьт.

Борух: Мере? ГІэйб? Эри чүь эхи ?

Эз асму оморени сес гром-гром.

Пенжимуьн шекуьл.

Хьэет хуней Муноши. Э лой чепи дес дор сибини. Э елойге шилхьон ве се-чор куьрсини. Э сер шилхьон симовори. Мунош ньушди. Мержо эдее чой декирде.

Мержо: Э ертуь мунди, мерд, эз гуькчеге духдер-хундегу? Чуьтам кукиму уре э чумгьоревоз хурдембуге? Фурмуш не сохдей?

Мунош: Хм. И гофгьойтуь эри чуьниге, нисе дануьсденуьм. Кук э сифот раче духдер миденишуь дие.

Мержо: НэгІ, туь имогьой дуз, очугь жогьоб ди. Дирей?

Мунош (*чоресуьзи*): Чуьтам не дирем. Песде эхи духдериш э денишире верзирени. Кук ме э бебей хуьшде омори, гьэдуьр гьер чире лап хуб варасире.

Мержо: ГьейсэгІэт вэгІдой зарафети-руьхшенди нисди. Ме егьин дануьсденуьм, у духдер эри чуьниге лап эз дуьли кукимуни. Э у кор тигьэт не доримге иму, нэчоьг-чи небу эз гьэйр. Оммо гуьом дузире, мере эз ужире серсонлуье муьгьбет гыч хьэз нисе оmore. Кук эн чүь имуни саламете одомигьо э кор зе хосдеи бурав у рэхьэ, комиреки бебе-дедешу норенуьт эри ю. Гьерчуьтам бисдогеш, гьэдэгьэ зерем э Сефер-хэгьерзорейме у духдере, Том-

ор гуфдиренигьоре. биеру имбуруз экиме, суьгьбет мисохум, хэелгьоуре мидануьм. Песде е чоре миофим.

Мунош: Эле, э дуьл туь, кидан, хубе кор недеге. Пой, зе, бед-хисоби не ведиров эзи войгейтуь. Гювунни. Етиме гЭили.

Мержо (э келегедиревоз): Ме хуьшдениме хуб мидануьм, туь коргьой мердитуьре сох.

Мунош: Эз расдекиш! (э е лойге) Хубчи сес несохум дие, кор зарафети нисди э дуьл и беде зе. Эри гьемме коргьо хуби, эри жофо кешире жун хуьшдереш гьимиш нисе сохде. Оммо кими мэхьэл гуйге садан бире сэхьиб дуьл ве эгьуьл ю.

Мержо: Э мерд, чуь хунде э зир вини, э зир эндуэ дуэразе винитуь? (Мунош вокурдени лэгЭэре эри жогьоб доре, гьопуь хьэет вокурде омор. Диреморени Томор). Диро, хьэлефме, хош омори, софо овурди. Веги куьрси, нуьш гьич эз иму гЭйб меевгу туьре. Иму бебе-дедейтуь хьисобим.

Томор (э гЭйбевоз): Себэхьишму эхэйрбу! Омбар согьбо-шит! (Нуьшдени). Ишму мере огол зеребирит? Ишмуре э меревоз, кидан, гьуллугьи.

Мержо: НэгГ, хьэсбошолум. Воисд мере туьре дире, екем куьнд шинохде, суьгьбет сохде (Декирдени пейлей чое, норени э пушой Томор). Ху, хэлефме, хубе чои.

Томор: Согьбоши, холе. Ме э лэгЭэзойге хурдем э хуне.

Мержо: Эже зигьисде туь?

Томор: Мере, ме эз детдом ведироморенге, жейлее утогь до-ри э общежитией кифлети.

Мунош э гужевоэ эдее чой хурде.

Мержо (нуьшдени эки Томор): Туь кукмере, Девере, хуб шинохде? Эз зуревоз? Метерс, очугь гу!

Томор (сессю лерзирени): Чуьтам? Чуь сохдем ме эри терсире эз ишму, холе? Эз диревоз шинохденуьм.

Мержо: Туь эвельминжи эз гоф келезе гъэйри мебош, ме зиедие хундегор нисдуьм. Дуьиминжи, нум терсире гофчуьн гуфдирем ме. Мере гЪэйб месох .

Томор (*сокит бирени*): НэгI, ме ишмуре серкуш нисе зеренуьм. Расди, вэгIдой э хундеи рафдеймени, бэхшлемиш сохит, э ме гоф мирасуь песеде.

Мержо: Пой, тэгъди месох. Чое эйчуь ней хурде? Бошку-бошку, шиновусдем, э хуне хурдей. Негуи э ме, туьре бегем гъич одомигъо-миросгъо нисди э гЪулом? Туьчуьни жогъиле духдер э общежитие эри чуь бие зигъю?

Томор: НэгI, холе, бебе ве дедейме гьердуьшу етим бируьт, э согъэ гЪулом екиш нисде мере эз номус бэгъэй, чуьнки ме э екиш дегмиш ней биренуьм.

Мержо: Эле, сикей энире нисе дире? Э туь гофиш гуфдире нисе биреки. Бошку, имогъой е чиреш пэхъни нисохум, димбе-дуз мигуьм гофмере. Туьре э кукмеревоз кортуь мебугу. Эри чуь? У туьре хосдге, гъирмизине лейлугъе эже бие берим иму? Э сер битехъэймгъо, э сер гъоврей бебешму?

Томор: (*э гъужевоз*): Гирмизине лейлугъ? Ме нисе варасиренуьм...

Мержо: Туь мере хэр-хом неогъ хъисоб сохде. Ме туь чуьнигъоре э гЪуьмурьме, э Худо шуькуьр, омбар дирем. Дес веги эз кукме, не шиновусди, етимчей куксег?

Томор (*вехуьшдени, э пой э гъужевоз поисди*): Дес вегинуьм эз кук ишму? Чуьтам хъэлево бирем ме эу? Эйчуь неогъ вешмерденит фэгъире бебе-дедеймере? Чуь гофгъои... Чуь гофгъои? (*рафдени*),

Мержо: Бура, бура, меш мугум чуьниге. Э песойтуь гирисетгор нибу... Туь эричуь нуьшдей э инжо? Эз туь эричуь сес ней ведироморе? Бебеи туь эри Девер ненге кес?

Мунош: (*евошлей сугърусдени, э чумгъою гIэрс де*): Эхи эз у гоф не ведиромори, чуь миестуьм гуфдире ме? Э, Мержо, э ме семе негуи, чуь бедхисоби сохди и етима духдер, туь эри чуь зугъэре сохде фэгъире?

Мержо (*екем сокит бире*): Элем не сохдиге, белки сохдеш мисохд. Е ГЭили имуре, эз хубе бэхдевере кифлет мивегирим иму эри эну духдере. У сэхьибсуыз э хысобовоз е де гиле бердол бири, согь божэхьэт муну э детдом-общезитиегьо...

Мунош:Туь чуй хунде зе? ГЭили у, неогьие хьэшогыо мевеше...

Мержо: Туь бегем проб сохдей? Егьин дануьсдени... ?

Шешимуьн шекуьл.

Читальни зал эн шегьери. Э зир лампе э зерде плафоновоз нуьшди Девер. Эдее книг хунде. Жейле нуьшди библиотекарь. Диреморени хэгьергилию, нуьшдени, пое норени э поиге, дегесундени папрусе.

Библиотекарь: О, привет, Маня! Хубчи туь оморей. Ме эз тэхьно нуьшдеи э и ализе жиге кор ме визор оморем лап. Чуй тозе хэбер овурдей? Гу зу, дуьлме эдее сухде хэберсуыз, гуйге одоми Говсуыз э герме руз гьеминони.

Маня: Дие мегу, дие мегу, хэгьер! Чуй хэбер мидобу гьейсэгьэт э шегьер? Эмеки гуйге хисире мегезоют. Екиш куьшде неомори, е вечехэриш хуьшдере эз пенжере не шенди, е жаандемие хунеш не сухди.

Библиотекарь: Нэгь-о! Туь мере нифурмуни. Элем небири э салгьой дусдиму руз, кей туь экиме тозе хэберсуыз бией. Дие хэзде месох мере. Гу бура!

Маня (*ох кешире, хуб э тегьнимиревоз нуьшдени, жендек юре э кемер куьрси венорени, норени е пое э сер е поиге, дегесугдени папрусе*). Туь Сефере шинохдени (*Девер у нуме шиновусденге, дениширени э лошу*) Уре е хэгьергилини, нуми ю гьисди Томор. Еtimi фэгьир. Хьэшо нивенуьм, зобуне кор э песою не дирем...

Библиотекарь (*зинде-зинде*) Эри, эри... Пой е мунут, мереш папрус ди (*кеширени*). Эри.эри...

Маня: Э екиш нигуи? Гоф дорени мере?

Библиотекарь: И чуй хэндее пуьрсуйши! Туь эзме дургердо, гьич лэгълэгьи дирей, эзечуй эри гуфдире?

Маня: Бошку, бовор сохденуым. Дан – у эз гьирмизине лейлугь терсире! Варасири биней коре?

Библиотекарь: Э серме эдей шек оmore...

Маня: Гье уни кор дие. Нум гьирмизине лейлугьэ гуьрдеки, хэлегигер бирени вирихде. Иш эритуь динже, саламате духдер, чуйтам кимигьо недангьо эз товуней энунелойгьэ шаздесале зе силис сохденуьт. Оммо дениш, имидме э туьни – э екиш е гофлеш... (*рафдени*).

Библиотекарь: Ха, кидан, те гьони гьеммей шегьер и хэбере шиновусди, меле пес мундем. Гьери дануьм. (*Вегирдени телефони трубкаре*) Холей Серэхь? Мирьен э хуне дери? Огол зенит уре... Мирьён, туьре гьэйб оморени? Ижире коре дани, эме негуи? Чуйтам гьичиш не дануьсдей?! Эчуйниге э екиш мегу – варасири: дие э екиш. Бошку – согьбоши. (*Норени трубкаре, гене вегирдени*). Хуней эн Сафанови? Мере Сипро гереки. Сипро – туьни? Ме те имогьой туьре бегьеме хэгергили хьисоб сохдем. Ингэдер коре дани, эме е хэберлеш не фуьрси! Миомориге, мигуфдириге, егьни туьш хэгергилимени, э и шегьер зиед нисди, туьш бие дани и хэлгэ хуно, чуйнки бибесуьзе Томор эз гьирмизине лейлугь терсире. Чуй? Ки муно эй туь не дануьсдей? Дие сес месох, имид ме э туьревози. (*Воисдени е гилейгеш зенг зере. Дироморени келемерд, э комиревоз иму э суьфдеи перде вохурдеймге*),

Келемерд: Рузисму эхэйрбу!

Девер эзбоштен денишири э суьгьбет дуь хэбербере зенгьой шегьер, гуйге э жигей хуьшде хуьшк бири мунде, сифотию гогь зерд, гогь гьирмизи бире. Келе мерде диренге, эз лэгьэю сес хэьрой ведироморе. Оммо у гирдени лэгьэре, тоб доре.

Келемерд: Несиет недит, чуй хубе книги ишмуре, гьесэг! Эт эри хунде? Корсуьзе одоми, келемерд бирем...

Библиотекарь: О-чуй ихдилоти (*вегирдени эз раф ишкоб книге*) денишит! Стихигьой эн шогьир иму. Шори ниетгьо, темизе муьгьбет, дуьруьсе дуьлгьо...

Девер ведироморени э пушой сегьне. Э песой кемер ю товуш муьрдени, е э серию офдоренъут ригагьо.

Девер: Ингьэдер гоф! Ингьэдер гоф! Е сэг! Эт пушо мере хуно мозоллуье одоми небу э г!уьлом. Гуйге вегирдет мере эз женнет гьелбегьел э жаандем шендет. Гуйге э е тутем эз офдои э гуьрвее гьур офдорем. Чуйтам? Эри чуйнит ишму гьечи бедхьисоб, одомигьо? Бегем э гуьл расирени мурдали эн хок? Бегем э Томор расирени мурдале хьэшогьошму? О, Худо!

Хьэшдимуьн шекуьл.

Утогь эн ресторани. Эки е шилхьон нуьшдет Борух ве Исай. Гьирмизине товуш эдее евошлей сукхе. Диреморени Одом.

Исай: Лелей Одом, бийет экиму. Омбар рази мибошим.

Одом: Согьбоши, хьэлефме. Эри чуй нэг! – минуьшуьм.

Серпои: Г!эзизе гьуногьгьо, шохьонгум ишму эхьэйрбу! Чуй михурит: эрэгьи, шороб, коньяк? Чуй мивихит: керг, кобоб, тозе жэг! Гьуллугь эн ишмуре эри веровунде хьозурум, чуйнки хьовир Одом э инжо э салию егилеш нисе омор.

Борух: Пой-о! Иму бегем инсонгьо нисдим?

Серпои: Худо мегуё! Оммо хьовир Одом эз гьемме хуьрметлуьни эриме. Чуйнки онгур. у дошденигьо, эз онгургьой женнетиш лезетлуьни. Сиротию э гьер гозит вебири, коргьой хьовир Одом келегеди шегьер имуни.

Борух: Гьечуйниге бошку! Э ме дениш. Э гьер жире ичку е шише миери, эз гьер чи-хурек, е бишгьоб. Оммо зобу мебугу, ме туйре гьэйри нисохум.

Серпои: У гоф зиеди. Шиновусдум – э сер дуь чум ме, лап рази мибошит эз ме.

Одом: Ишмуре, кидан, имбуруз мигИидиге?

Борух: Э е метлеб ме расирем. Дузи, бесгъуни дорем.

Исай: Ишму, лелей Одом, эй гофгъой энду дуь кепикиш медит. Хосиет Борухе нисе дануьсденит? Лэгълэгъи омбари, кор – кем. Чув бесгъуни бириге, юш дануьсдени.

Одом: Эз расдекиш, Борух, хэлефме, эз гофгъойтуь серме нисе вадарафде, чув мэгІно де э угъо?

Борух: Бошку, Ишму гуит: чув звери – мерд ненге зе, муьгъбет енебуге дусди?

Исай (э е лойге): Эле, эгене сер гирд. Белки бэхили сохде? (Сэхд) Бошку, хэрмэхиму эри овосунегъой туре гуш веноре не оморейм э инжо...

Одом: НэгІ, Исай, пой екем! Эриме эзечув оморени, и неогъие гофгъо герек нисди. Жогъоб мидуьм: гьер коре жигеюни. Дусдиш гереки инсоне, муьгъбетиш. Ненге дусди сохдиге, бегем эри муьгъбет жиге нибу дие?

Борух (шори сохде): Омбар согъбоши, лелей Одом! Ме дануьсдебируьм, ишму мере миварасит. Эри меш гъечув оmore: сад раче зеш бисдоге туьре, оммо дусдире фурмуш сохде э бегъеме мерд нисе гуьнжуьсде.

Исай (э терсезов): Э Борух, динж нуьшде гъишдени?

Серпои: Ини, дусдгъо, эрэгъи, шороб, коньяк. Ини, бироргъо, керг, кобоб, жэгІ. Ини, хэрмэхгъо, нарзан, компот. Ини, мирогъо, сиб, гІэрму, гъэйси (Рафдени).

Борух (Декирдени эрэгъи, вегирдени пейлере): Э хотур дусди мерди воисдени хурде мере имогъой (Вешендени).

Исай: Э хотур чувш не хурдге, эгене гьемме э шугъэм дарафде. Туь, лелей Одом, э гъирогъ мепой.

Борух (э сэхде сесезов норени пейлере): Туь, лелей Одом, ме шиновусдем э жогъили келе кефчи бири. Эз межлуьс имуш, кидан, нидемуни (Хэндуьсдени). Оммо ме гофмере эле не варасдем. Э, Исай, э овом, э терсенго, гоф гъишдени гуфдире мере?

Исай: Гу чуй воисдге туьре. Иму бирорим гьемише. Э туь мешет бире, зарали сохде ме ихдиер бегем доренуьм? (*Декирдени гене, дебердени*).

Борух: Лелей Муношиш э ишмуревоз бирор нисди, лелей Одом? Э сереботи Девери гофме, дуьлестиме, гуьном очугь, чуйнки мерде пэхьникие сур ние бу.

Одом (*Э мэхьтелиревоз*): Э сереботи Девер? Эзу гЭил ме зобуни не дирем, эз хэлгьиш не шиновусдем. Эгенеш ишму хьэрмэхгьой екинит гуйге?

Борух: Гье уни кор дие? НэгI. Дуз нисд, Исай?

Исай: (*декирдени пейлере*): Гье уни кор, лап дузи. Уни...

Одом: Ишму гЭилгьойме хьисобит. Гьумуьрме ченд салгьой гьердуьшмуни. Оммо е сэгIэт эдем гуш дошде, эгене те лпей ихдилот не расирейм.

Борух: ТэгIди месохит. Гьони мирасим.

Исай: Месохит, месохит. Егьин мирасим (*Гьенжирени*).

Борух: Девер эйме бирор бу. Э песой е мотишке рафд, дусдиму фурмуш бисдо. Хубе одоми не ведиромо. Гьери, Исай?

Исай (*э тикей кергевоз э лэгьэ, э гужевоз*): Лап эри. Не ведиромо... Туь хуб дануьсде. Иму бирорим!

Одом: Девер э мотишкеревоз?! И чуй хунде? Э нелоигь, гьэлет месох, э у дегмиш мебош.

Борух (*э хуьшде дироморе хуно*): Чуйтам? Эки, лелей Одом?

Одом: Э у фэгьиревоз. Э э у етимовоз кортуь мебугу, мурдал. Э гиснеи, тешнеи, тэхной келе бири у, э ловгьою гьелем шир гЭили хуьшк не бири. Ме у духтере эз гЭилино шинохденуьм, ме э бебеюревоз э еки э пушой гунилего рафдем. Бур сес туьре.

Борух (*терсирени*): Бэхшлемиш сох, лелей Одом. Белки не дануьсдем, белки эйме эзечуь омори. Эз туь сес нисе ведироморе эхи, Исай?

Исай: Эзечуь омори. Лап хуб омори (*Норени сере э сер шилхьон*).

Одом: Инжо жигей эню корго нисди. Песде туьш тойме нисди. Неге синлегерме бэгьэй нисохдуьм туьре, нелоигьэ Борух.

Оммо эдем еггын гуфдире э туь: небу дие мурдале лэгГэйтуьре э песой энду духтер вокуну.

Борух (*Диренге, Одом рафди, э хуьришевоз*): Бура, бура, кидан, туь хуте сохдей у мотишкелере, эз гьирмизине лейлугь хьэлежигер бу. Рушгьой туьре пара бэггэй нисохум (*Хурдени дуь пейле коньяке пес-песеeki, суьст бире, офдорени э хори*)

Серпои: Э инжо кидан бегьеме бесхуни бири. Ки дербодогьун сохди иере? Имогьой лап эз чум офдорет, чуьнки одоми хуьшдере э тэхьэриу не гирдге, эз у одомиети дие нибу.

Хьэшдимуьн шекуьл.

Утогь Томор э общежитие. Гьоб-гьужоб ведини, етте косиби. Каравот, дуь куьрси ве шилхьон, э сер суьфре гуьлгьои э бонке. Сара ишкоб. Э раче-барачей томошесохдегорьгьо ведини вокурде пенжере. Диреморени Томор.

Томор: Хэсдеюм гьэдерсуьз. Серме гьоггэ хуно бири. Чуь бие сохде биев? Э хубе руз не вохурдей туь э ме, гГээзизе бирорме, Девер! Гуфдиренуьт, рэхь одомире сие назу гирошдге, бэхд нибу. Рэхьимуре, Девер, сие аслан не дургуне хьэрмэхь ве нечоггэ дейтуь гирошди.

Бирден эз куче оморени сес мэгГни:
Мугу: у гьисд духдер хуне
Ю эршефи, коргьоюш суьрх.
Дегиш бисдо ю эз бине,
Э жовоггил чаруьсд э зуьлх.
Ой, Томор, и чуь кори,
Чуьни гьирмизине лейлугь.
Эз гуфоре туь офдори
Э мурдале лап назуке лугь.

Оморени сес кукгьо ве духдергьо: «Ха-ха, хьэлежигери, юш духдер хуне". Гирошденыут. Томор нуьшдени э сер куьрси, гуйге

офдорени, десгьоре норени э гьирогъ шилхьон эри екем гирде хуьшдере.

Томор: Чутьам? Эри чуй? Белки и хови? Енебуге оморени эриме? Чумме э суке мэгни кес! Песде эгене "гьирмизине лейлугъ". Мурдале, бедхьисобе г'уьлом!

Дере куде, дироморени Одом. Уре элем эзи песини кор хэбериш нисди.

Одом: Г'эмел миев эки туй дироморе, хэлефме? Туй э ме не дениширейгеш, кидан, пиш нисохи.

Томор: Лелей Одом? Туйни (*гиридени*),

Одом (*гуйге эз сифотию синле зере омори*): Г'эилме! Чуйни гене? Туй гиридени? Ки хэлево бири э туйчуйни етим? О, Худо, чуй сохде туй!?

Гирьей Томор нисе гиросхе. Чарундени сифоте э лой пенжере, Одом г'эрсгьоуре не винуь. Одом декирдени пейлей Г'ове. Десгьоу эдей лерзире. Норени пейлере э пушой Томор. Нуьшдени. Эз пенжере гене сес мэгни омор:

Вессит бурайт, шиновусдим:

Ег'ни и духдер темизи.

Эй, мотишке, лап дусдим,

Чуй герексуьзе силиси.

Гу эриму, Томорле,

Эз лейлугъ эйчуй терсири,

Элем не бирей келе,

Э пире дедей верзири.

Оморени сес хэнде эн пиене кукгьо. Киниге эдее гуфдире: Ини пенжерею, гьери денишим – э белки э имуш рази бисдоге. Екийге: Дузи! Бейт! Зу!

Одом: Мэхьтел мундем: мурдале мэгИни? Кини, Томор? Гьичиш нисе варасиреньум. НэгI, ме и коре э жиге миерум!

Ведироморени. Томор демундени э гирье. Эз куче суьфде оморени сесгьой лутьигьо. Э пенжере веде бирени е гьирмизине бигьверие сифот. Э мурдале суьпле хэндеровоз дениширени э гьэд утогь: «ГьесэгIэт миофим! Гофиш нисохим. Имуш мердим! Имуш кем-биш дануьсденим». Бирден у вир бирени, гуйге офдорени. Оморени сес женг. Песде еки хьэрой дешенде: Одом-колхозчи! Э у ниверойм! Вирихит гьемме! Одом вогошдени э хуне. Э куче дие сес-суьмуьгиш нисди. Томор э гужевоз поюндени гирьей хуьшдере, гьово гирдени сере, покурди гIэрсгьоре.

Одом: Дие мегирис, хэлефме. Ме элем не муьрдем.

Томор: Герек нисд, лелей Одом! Э гьер одоми нигуи.

Одом: Верф омори – эжеи гIов? Гоф гуфдирем – эжеи сес? НэгI, нэгI, ме десе э шугьэм гирде, нинушуьм. Ме э инжо поисде дие нидануьм – дуьл эдее пара бире... (*Рафдени*).

Томор: Косиб! Эз меш омбар у эдее гьэйр кешире. Ме чуй бие сохум? Э и шегьер мере дие зиндегуни нибу. Ме мирам эз инжо. ГIуьлом келеи, эймеш е динже жиге офд миев.

Ведешендени чемодане, вечирени э унжо гьисдигьо партал хуьшдере. Дироморени Сефер.

Сефер: Туьре э согьэ шегьер эдее гешденуьм. Туь и вэгIдои э хуне де? Дие нубогьо чуйтам? Э чемоданевоз чуй сохде туь? Элем э хуней одохлу рафде вэгIдо нисди (*хэндуйсдени*). Чуйтам оmore эритуй зарафетме?

Томор: Гьичиш! Песде мидани! (*Вегирдени когьоз, нуьвусдени*). Минет сохденуьм, и когьозе э Девер миди!

Сефер: Ижире гуьллуьг туьре э келе шориревоз мисохум. Е поймере инжо мивини, е пойгеймере – э унжо хьисоб мисохи.

Томор: Гьемме коргойме э и шегьер варасди. ТэгИди сохде гереки, мешет сохдегор небу (*сэхд сохдени чемодане, ведироморени*). Э сегъне бирени ниметовуш. Э пенжере веде биренуыт товушиегъо. Угъо гогъ дегесиренуыт, гогъо муърденуыт.

Оморе сес эз мэгИни Томор:

Ме туьре э муьгъбет гешдем,
Деверле, бирор.
Ме туьре э буди гышдем,
Рафдуьм гуйге бигIор.
Мегешд мере, жон Девер,
Хьисоб сох – муърди,
Муърд астарайтуь э звер,
Тие дерд мунди.

Нуьимуьн шекуьл.

Куьнж куче. Эз е логъ ведироморени Сефер.

Сефер: Ме хэгьергили Томор гьисдуьмгеш, бегем ме одоми нисдуьм? Эхи мереш дануьсде воисдени, чуь гофгъо нуьвусьде омори э и жаандемие когъоз. Мере сургъой муьгъбет кесе лап хуб дануьсде воисде. Хунум?

Эз чепи логъ сегъне оморени Девер, серию гъузи, э фикир де.

Сефер: Девер? Туь эзже оморе гьечи дуьлхуьрде хуно?

Девер (*э хэсдеиревоз*): Туьни, Сефер? Чуь хэбери эз туь? Зиндегунитуь чуьтами хэгьерме?

Сефер: Хуби, чуь бире мере? Туь гуйге дур гердо э есхуне дироморей. Гьичиш нибу, гьейсэгIэт михуни и когъозе, э хуьше лап хуб мией.

Девер: Когъоз? Чуь когъози бегем? Эз ки?

Сефер: Ки мифуърсуь мере эки туь э когъозевоз э и шегьер?
Э гӀрси суьфде мере огол мизени (*Рафдени*).

Девер вокурдени конверте, хундени: "Гъемише шор гердош,
нумневерие бирорлейме. И ме гъемишеине бӕхш муно эритуь
эзме:

Ме имогъой гьелбетте тӕхлуьм,
Чуьтам дие эриме рӕхь нуьм.
Эри туь сохдем ме мӕгӀлуьм—
Туь нибоши, ме мимуьруьм.
Мегешд мере гъич вӕгӀдо.
Ниофи эзимбӕгъдо.
Бугу рӕхтуь, дусдме, дуз—
Миофи мозол ве руз."

Девер: Чуьтам? Рафди эз шегьер? Томор? Де ме кире герекуьм э и гуьлом, э и бедхисобие шегьер? Гирисуьм? НӕгӀ, ме мерд биреимере фурмуш нисохум. Эхи ненге хун дуьлме те эхир э синейме тигъи мибу, сермере и фикиргъо лов мисоху.

Веди биренуьт Борух ве Исай. Диренге Девере, дешенденуьт хуьшдере э песой дор. Дениширенуьт пӕхники.

Девер: Текей хунум ме и хӕре когъозе? (*Хьӕрой дешенде эз гъеммей гъувот хуьшде*). НӕгӀ! Небу дие нуьвуьси ижире хӕре когъозе! Томор! Эжеи туь? Месох эме руьхшенди!

Оморени сес мӕгӀний Томор (гофгъой мӕгни э когъоз вери). Девер гуш веноре. МӕгӀни варасдени. Девер шендени хуьшдере эз е лой сегъне эе логъиге.

Девер: Томор, пой, меш э туьревоз. ГьесӕгӀэт мирасуьм...

Эз дури оморени сес Борух: Дусдире шенди, э песой эз хори невороморе мотишке вирихд. Хуб жигею бири. Туьни тӕхсиркор. Туь – иму нӕгӀ, хьӕсбошолум!

Девер: НэгI, ме э унжо Томоре ниофум (рафдени э е лойгей сегъне). Ини хьэрмэхьме, ини, диреньум.

Эз улогь оморени сес Мержо: ГэрсI, хэлефме, енгесуыз эри гьеммей жэгIмет руьхшендини. Дан эритуй эри е гилейге: духдер терси эз гьирмизине лейлугь э ер овурде, у егьин мотишкеи.

Девер: НэгI, мере бире деде герек нисд. Ме бие бурам – уни, диреньум Томорлеймере, рэхь сохд мере эри гьемишеине (*Вирихдени. Э нушой сегъне ведироморенуьт хьэрмэхлегьо*).

Борух: Э инжо Томор чуй сохде? И бегьем гьэриши бири, э жун гьоврей бебейме. Эчуй хуби эри ю. Э гофме недениши.

Исай (*э гьэйревоз*): Чуй сохдейм иму, Борух? Эри чуй? Ки бу мешет э иму? (*Видовусдени э песой Девер*).

Борух: Чуй сохдейм? Хэндее пуьрсуйши! Гьичиш ней варасиренуьм. Иш э ме хьэлево бири. (*Гуфдирени э лой зал*) Ишму эрчуй бисдо варасиренит?

Евош фураморени перде.

Дегьимуьн шекуьл.

Вокзол эн шегьер. Зал э гузет сохдеи. Оморени кими мэхьэл сесгьой вогунгьо, одомигьо: Рэхь дит! Мундим эз вогун! Билетгьойту эжи? Зубош! Э зир вогун мидарай-мидемуни!

Дуй скамейкеи э дуй логь зал. Э мигле э хори Девер нуьшди. Мугьойю сип-сипи бири. Шеи парай. Э дивор сэгIэт ве, э сэгIэтию е гиле зарбе сес сохде. Дироморени Одом. Кемерию гьузи, сифотию эз дерд зерд бири.

Одом: Чуй сохде туй, хэлефме, э инжо? Гу э ме чуй гереки туйре, белки меле семе кумек бире миданьум эри туй.

Девер (*Эдебу э чуйлеревоз гуйге шекуьллегьо зере э хори. Гьово гирдени сере. Э чумгьою гIэрс дери. Э шориревоз*): Э лелей

Шафадигъо, ме э туь сади пенжо сал дениширем. Ме э туьревоз садипенжо грамм эрэгъи кес не гьенжим.

Одом: Туь мере не шинохди, Девер? *(Нуьшдени э скамейке. Чубугъэ э десию дери норени э пушой хуьшде. Э зверию норени сере)*. Чутьтам дегиш бисдо гъуьлом э дуй-се руз! Эри чуйни гьемме? Э сереботи бедхъисоби?

Оморени эз дури сес тозе мэгъни Томор:

Дуьлме сокити, руз ме дурази.
Мегирисит, дусдгъо.
Гьер одомире корю хъэзи,
Хуби товуш, варасдгъо.
Эз пенжере ме дирем вилеете,
Деги гъоворе, думон.
Хов де чумгъоре, хисуьм ме етте,
Мегирис эри ме, инсон.

Диреморенуьт Мунош, Мержо. Муйгъо ю лови, сифотию пара-пара. Сефер, Исай.

Мунош: Мекуьш дие хуьшдере. Ини кукиму.

Девер: Ха-ха-ха, кукме э бебе чаруьсди.

Мержо *(э сэхде гирьеревоз)*: Балалейме, туь э хори нуьшдей? Месох сипре муйгъой бебейтуьре биебур э пушой хэлгъ. Вехуьз эз сер мурдале хори.

Девер: Эз расдекиш, шоволгъойме гъэд-гъуд бири, эри кейф сохде чутьтам мирам? Гъичиш нибу, гъэруьсме эз хубе гъошире кифлет мибу, мибэхшуь э ме тозе кастум...

Мержо: Чуй гуьфдире туь, Деверлей деде, белки е жигелейтуь енебуге сер дорд доре? Гу э жаандемие дедейтуь, пэхъни месох сур дуьлттуьре! Лап воисдениге туьре, э рэхъ бебе-дедей норигъо нисе рафдениге, у ализе духдереш михоим эритуь, энжэгъ жунлейтуь согъ бу...

Девер (*э тегънимиревоз*): Муърдегъо эри зиндегъо ниhoю, холе!

Мержо: Холе? Туъ э меревози? Туъ мере нис шинохде?

Мунош: Э хэлефме, туъ эз иму дес вегирдей? Ини дедейтуъ.

Девер (*сэхд хъэрой дешенде*): НэгI, ме у гофе нисе варасиренуъм, чуъни дедей, эжи дедей? Ме э хуышдеш нечогъум, диеш нечогъ месохит мере...

Мержо: Гъэриш бири Девер, ме эдем муърде (*сусд бирени офдоре э хори. Сефер оморени куънд эри э хуышде дировунде*).

Исай: Ме тэхсиркорум (*Гирисдени*).

Мунош: Ини мейвогъой шефдиму (*Буррани шеире э сине*).

Девер: Имогъой диренуъм – игъо хубе одомигъоют, эри э меревоз вози сохде оморет. Бие вежеим! Мэгни хуним (*Хундени*).

Эй сазандар, зе эз гъовол!

Диреморени сипрерушверие келемерд эз суъфдеи шекуъл. Э тигъэтевоз дениширени э Девер.

Келемерд: Ме и куке эжеиге дирем.

Гъеммейки эеки дениширенъут э Девер. Лоле сегъне.

П е р д е .

ДУСДОГЪ

Пьеса эз се перде

Возиренигъо сифотгъо:

Ихил – келемерд, бэхшвегир Келе довгЮой Ватани

Муьсхуьд – кук ю

Мержо – духдер ю

Хьизгьил – хьовир Муьсхуьд

Сара – хэгьергили Мержо

Гьевнил – нуьвуьсдегор

Дагман – дусдогъчи

Пирил – гьонунпузмишсохдегор, э дусдогъ

Симон – гьонунпузмишсохдегор, э дусдогъ

Динор – жовоне духдер

Милицонер, дивунчи, серпои э кафе

Екимуьн перде.

Руз пишнеини, гьеминон. Э скамейке э куче нуьшдет Мержо, Сара, Хьизгьил. Чьуниге э гЮэрей хуьшде суьгьбет сохденуьт, кими вэхд сес шоре хэнде оmore эз ишу. Эз чепи тараф э гьирогъ сегьне ведироморени Муьсхуьд. Э дес ю вокурде, чуькле книги.

Муьсхуьд: Эхиркор салгЮой школеш э барасиревоз варасдет. Гуйге эз дусдогъ э азади ведироморем. Чуь мибу диеш? Ини э десме книг буьзуьрге шогьир уруси Сергей Есенини. Нум эню э гьемме гЮуьлом мэгЮлуми. Оммо нуьвуьсдигеш у гЮэлемете, лугьонде стихигъо ве дестонгъо, ю си салиш эз гЮуьмуьр не мунди. Эзу битте – хуьшден ю э десгЮой хуьшдеревоз куьшди хуьшдере. И чуь бидэгЮэтини? И чуь мэхьтеле кори: Чуь гьувот

кешири берди уре эз пушой гҮуьлом? Чуьтам одоми э божорени хуьщдеревоз э келе эгъуьлевоз телеф бирени? Ки мидануь и килитлемере?

Эз дури эдее оmore сес мэгҮни Муьсхуьд:

Келеи гуьлом Хори,
Пэхьнини эзме духдер.
Гуйге астарa терсири
Оmore экиме эз зевер.
Бие, бие, ерме бош,
Дуьл екире сохим хош.

Э гьер жигеи туь гуйге,
Оmmo нисе диренуьм.
Э десме гуьгьои, буйкеш,
Гьерруз эри туь вечиренуьм.
Бие, бие, ерме бош,
Дуьл екире сохим хош.

Эз сегьне эз лой расди э лой чеи гирошдени жовоне духдер Динор.

Муьсхуьд: И чуй раче духдери? Гуйге эз тие суьрх офире омори. Бурам дуьндуьрмиш сохум уре, гоф сохум? НэгҮ, у тойме нисди, той падшогьи!

Муьсхуьд чаруьсдени э лой скамейке. Эз лэгҮэю шоре сес ведироморе.

Муьсхуьд: О, ишму э инжоит. Эз ишмуре гешде хэсде биремки ме.

Хьизгьил: Туь имуре, иму туьре эдее гешденим. Эже не рафдейм. Э зевер шегьер, э гьирогь дерьегь.

Мержо: Кидан бирорме ошугъ бири. Негуи э иму нум сев-
гили туьре, Муьсхьуьд?

Муьсхьуьд: Динж бош, хэгьер, гьелем не офдем. Оммо оф-
думге, егьин суьфде э туь мигуюм.

Сара: Гуит э ме, сур нисдиге. Ишму хэгьер-бирорит, оммо
школере э е сал варасдейт.

Мержо: Е сал бирорлейме нечогъ биребу. Унегуьре э клас-
симу гиросди.

Хьизгьил: Азадни, хьовиргьо-хэгьергилигьойме. Чув мисо-
хим имогьой? Э кор мирайм эри жофо кешире ненге диеш миху-
ним, совод мивегирим?

Муьсхьуьд: Ме э кор фэхьлеи эдей рафденуьм.

Сара: Чувтам? Туь э суьрхине медалевоз варасдей школере –
фэхьлеи эри чув? Туь бие боши холисе гилмчи, келе дананигьо
диеш вегини. Эри энун совод вегирде гереки.

Мержо: Э расдеки, бирор. Ме эз туь и гофе суьфдеи гиле
эдее шиновусденуьм.

Хьизгил: Кидан, Муьсхьуьд зарафет эдее сохде. Э пушой
иму ингьэдер рэхьгьои...

Муьсхьуьд: Ме эз зуревоз стихигьо нувьусденуьм. Мере
шогьир бире воисде. Оммо эри энун зиндегунире эз бине бие
дануь. Вэхд миев э институтиш мидарам, Худо гьишдге. Гьелел-
уьге – фэхьлеи рэхьмени, гьисметмени.

Э сегьне ведироморени милиционер.

Милиционер: Кини эз ишму Муьсхьуьд?

Жовонгьо мэхьтел биренуьт.

Муьсхьуьд (*динже жире*): Менуьм.

Милиционер: Гирор э меревоз э дивун шегьер. Э сертуь
шувкеет омори, ки туь зерей, яралуь сохдей нувьусьдегор имуре
Гьевниле.

Муьсхьуд: Ме уре шинохдеш ней шинохденуьм. Ме имбуруз школере варасдем.

Милиционер (*суруле жюре*): Дие гоф зиеди. Э ме доре омори буйругь офде, оворде туьре.

Милиционер ве Муьсхьуд рафденуьт.

Хьизгил: Иму и коре гьечуь ние бигьилим. Бие бурайм э дивун. Мержо, туь мегирис, гьелем ечиш очугь нисди. Бура э хуне гьемме гьозиере э бебе гу.

Дивун шегьер. Нуьшди дивунчи. Поисдет Муьсхуьд ве милиционер, Ихил, Гьевнил ве диеш.

Дивунчи: Нуьшит э куьрси, хьурьметлуье Гьевнил. Иму эи се руз дениширейм и коре. Ини дуь шогьодигьо, эже зигьисдегоргьой шегьериму шогьоди доренуьт, ки шев-нимешев Муьсхьуьд зери э кордеревоз э сереботи коминиге духдер нуьвуьсдегор имуре Гьевниле. Ини шогьоди духдир э товун бирей дес ю яралуь. Кор очугьи. Иму дореним Муьсхьуде се сал дусдогь суруле режим. Кор варасд.

Муьсхьуде берденуьт. Сифот ю сокити. Гьемме рафденуьт.

Гьевнил: (*гүфдирени эз Ихил*) Леле, мере э ишмуревоз гофи. ГЭмел миев, нуьшим гоф сохим? (*Нуьшденуьт*).

Гьевнил: Кук ишму стихигьо нуьвуьсде. Ме бирмундумге угьоре э дивунчи, белки дуьл ю нерм мибу, салгьой дусдогьи Мутсхьуде кем мисоху.

Ихил: Гьечуьниге ме миерум угьоре эки ишму. Келе согьбоши эри ники.

Себэхьмундеи: Гьевнил гирди э десгьо пенж гьолинде дефтергьоре э стихигьоревоз.

Гьевнил: Ме шиновусдем э е жиге стихигьой эни куке. Диренуьм, лап божеренлуьни. Минувьусуьм эз нумме, дофус мизенуьм. Нумме мибу тэгрифлуь, пулиш миев хэйли. (*Хэндуйсдени*). Гьери хунум е-дуйдуре. (*Вокурдени, дирени е-дуй велге*) Эле, игьо терадгьой школеини. Фирмунди мере келемерд, руьхшенд сохди эме. Оммо ме уре хоме одоми хьисоб сохдебируьм. (*Пара сохдени шеи хуьшдере*) Дие эричуь герек бу мурдале коргьойме? Чуь не сохдем. Хэйли пул хэржи сохдем. Э пушой дивунчи э сугьрезани поисдем, дуьшменмере э дусдогь дешенуь, егІни у келе гьонунпузмишсохдегори, э ме келе зарали сохди. Вой эри коргьойме! Эи бинемусиревоз чуьтам зигьуьм ме, хубчи ме хуьшденме мидарафдуьм э дусдогь.

Дуьмуьн перде.

Дусдогь. Э утогь шилхьони ве се табуретке, вегосунде омогригьо э хори. Нуьшдет Пирил ве Симон. Эдее лугьой нун хуьшдере хурденуьт. Диреморени дусдогьчи Дагман. Дировундени Муьсхьуьде.

Муьсхьуьд: Руз ишму э хэйр бу.

Симон: Руз э хэйр бу, бирор. Нуьш, ху екем э имуревоз.

Муьсхьуьд: Согьбоши, мере гисне нисди (*оммо нуьшдени*).

Симон: Э иму эз шовуревоз гуфдирет, ки тозе хьовир минуьшуь экиму. Гуфдирет у секонелуье гьонунпузмишсохдегори, одомире э кордеревоз зери. Оммо туь чуьниге э ужире одоми ухшеше нисе зере.

Муьсхьуьд: Гьемме хьэшой, гьемме хьэшой...

Пирил: Дие чуьтам туьре эри нисдие кор э дусдогь дешендет? Ме, меселен, бебей э кифлетуьм. Кор сохдем э консервни корхоне. Вегирдемо эри фэхьлеиме пул кифлетмере эри дошде вес нисе сохдебу. Дуьздирем, дургу нигуюм. Туь чуьтам тэхсирсуьз э дусдогь дарафдей?

Муьсхьуд: Э ме гуфдирет, гуйге ме нуьвуьусдегор шегьерире Гьевниле э кордеревоэ эз дес зерем эри коминиге духдер. Оммо у кор не бири. Гьемме хьэшои. Эри чуй? Эхи ме эри екиш зобуни не сохдем.

Симон: Чуйтам бире ужире коргьо? Пул эри гьэлпелуье шогьоди мидуь, пул эри дургуне справкей духдир мидуь. Чорей дивунчиш нисди, дешендени одомире о э гьонун гуьре. Кидан, туь рэхь эн ализе Гьевниле гирошдей. Фикир сох!

Муьсхьуд: Ме эз зуревоз нуьвусьдем стихигьо. Е хэйли нуьвусьдем. Еки эз лусдгьойме бирмунди кими стихигьой мере э Гьевнил. У хунди, е гоф не гуфдири – не хуб, не зобу, вогордунди угьоре. Песде пушой мере э дусдогь берде бебейме гуфдири, ки Гьевнил хосди у стихигьоре – егҀни э дивунчи мибурмуну. Дуьл ю дегиш мибу э тарафме. Салгьой нуьшдеймере мибуру. Ме не гьишдем.

Пирил: Имогьой ме варасируьм. У э шогьири туь бэхили сохди.

Муьсхьуд: Чуйтам: Стихигьой кес эри чуйни уре? Чуй хэйр мивинуь эз кес нуьвусьдигьо?

Пирил: Минуьвусьуь э дес хуьшдеревоэ. Нум хуьшдере мивенуь – пулиш гьэзенж мисоху, тэгҀрифлуьш мибу.

Муьсхьуд:

Э коми земон,
Э чуй вилеет
Бири ижире бедхьисоби?
Куьшит мере,
Зенит зиед,
Дуьлме сэхд битоби.

Товуш муьрдени. Песде евошлей-евошлей дегесирени эгене. Се имогьой дусдгьо эдее хурег себэхьимуьн хурденуьт.

Симон: Муьсхьуд, ме гоф сохдем э Дагманевоэ, торих гези-ройтуьре гуфдирем очугь. У жогьоб до, ки гьемме герекие

кумеки мисоху э туь. Нуьш э дусдогъ динж, нимей вэхдтуьре мибурут. Мирай э хуне шор.

Муьсхуьд: Согъбоши, бирор. Чуьтам вогордунум ме кумекитуьре?

Симон: Ичиш нибу. Мирай э кор фэхълеи, чуьтам туьре воисдебуге. Шохъонгумгьо минуьши, минуьвуйси стихигьойтуьре. Имуре эз угьо лап хьэз омори. Воисдге эримуш михуни, дуьлгьой имуре шор мисохи.

Муьсхуьд: Э дусдогъиш миданим зигъисде, холисе инсон бире. Ме эз фэхълеи нисе терсиренуьм, э салгьой школеш гьер гьеминон э колхоз жофо кеширебируьм.

Себэхьимун мердгьо вогошденуьт эз кор.

Муьсхуьд: Эз кор гьеммей жендекме тари. Буй эрэгъ эдее оmore. Хуб кор сохлем ве э лезетевоз. Имбурузине корме варасди. Форигъэти вегинуьм.

Пирил: НэгI-о! Доребири имид тозе стихигьо нуьвуйсде. Бие хун эриму, шори сохим имуш.

Симон: Эри, дуз гуфдире бирор. Хун, Муьсхуьд, хотур имуре меил.

Муьсхуьд:

Э форигъэти сохденуьм бэхили,
Дори кор э дес киниге,
Мереш мунди гьувот эхири,
Хиник бу – эз кори ини герм .
Гьемме дузире сохдени жофо,
Гьемме бедире сохдени тембели.
Корсуьз поисди – э хори офдори,
Кор доре гьувот э жун белки.

Гирошдени вэхд. Э угогъ диromорени дусдогъчи.

Дагман: Тозе шоре хэбер. Туь, Муьсхуьд, дери э и дусдогъе сал э нимеревоз. Эри зарблuye зэхьмет ве соките хосиет туьре себэхь э хуне фуьрсоренуьт.

Муьсхьуд: Туь жун ки? Зарафет нисе сохде?

Дагман: Лап гьисдие кори. Гьемме дузи.

(Хунденуьт эеки):

Азади. Азади
Чуь ширини и гоф.
Шори дуьле берди,
Бирем никилуь ве соф.

Азади, азади
Гердо эри темизгьо.
Нисд Муьсхьуьде гьарди,
Гьисди раче рузгьо.

Сеимуьн перде.

Хунеи. Нуьшдет могьбул Ихил э Мержоревоз. Вокурде оморени дер. Диреморени Муьсхьуд, вокурде тозе парталгьо, э дес ю туморелеи. Бебе ве духдер эз нехэберекие шори чуь сохутге нисе дануьсденуьт.

Ихил: Туьни, куклейме? Эхи туьре се сал дори, ниме бэгэьй не гирошди.

Муьсхьуд: Эри зарблуть кор ве соките хосиет мере те гирошде оморигоь э дивун рохьо дори. Чутамит ишму?

Ихил: Э жун бебейме, туьре э шоре руз рохьо дори. Эри хэгьртуь илчигьо омори, кук лап хуби, дирем, эз дуьли Мержо бири. Оммо у жогьоб дори, ки туь эз дусдогь не ведироморе, э екиш э шуьвер нирав. Имогьой мивозим г1эруьси.

Муьсхьуд: Омбаракбу, хэгьерлейме.

Мержо (э *г1эйбевоз*): Согьбоши, бирор!

Гирошд бист сал. Хьизгил ве Муьсхьуд нуьшдет э кафе.

Хьизгил: Коргьойтуьре хуно гердо коргьой гьемме хосдегоргьойму. Туь имогьой бирей тэг1рифлуть шогьир, девлетменде

одоми, туьре гьемме вилеет шинохдени. Омбар не дирейм иму дуй-екире. Ме эз песой школе рафдем эри гьуллугъ сохде э лешгер. Песде вегирдем совод. Имогьой бирем рэхьбер дуйруьжде корхоне э Москов. Кифлетиш бири мере. Туь чуйтами?

Дироморени Динор.

Муьсхьуд: Шинох бошит. Ини – бирорме хьисоби – Хьизгил. Ини зенме Динор. Иму е ченд гиле вохурдейм бирден э куче, песде ме варасируьм – и духдер гьисметмени. Имуре дуй куки.

Хьизгил: Коргьошму чуйтами, хэгьер?

Динор: Хуби, Худо мебуру. Эз гЭзилгьо инжимишиш гьисдуймге, гьер руз шори эз угьо.

Хьизгил: Тевесер зигьошит э еки. У мурдале хьэшочи Гьевнил – эзу чуй хэбери?

Динор: Туь бовор нисохи. Е руз келе гуьрдleme бу эри шогьери Муьсхьуд. Стихигьой энуре хундеки, Гьевнил эз некуми офдо э хори. Дуьл ю неветовусд эз бэхили. Гье у руз телеф бисто.

Муьсхьуд: Де мегирит нум энуре. Оммо э кумеки эн уревоз ме э дусдогь офдорем. Эз гьемме зиндегуниме у рузгьо хуб бири эриме, чуйнки холисе, бегьеме инсонгьоре шинохдем. Эз ужире инсонгьо е Худои звер.

Дироморени Ихил. Э пинжек ю орденгьо ве медалгьои. Нуьшдени эки гЭзилгьой хуьше.

Ихил: Хьизгил, туь кош оморей. Чуй хэбери эзтуь? Бист сал не дирем туьре.

Хизгил: Борухэшим, зиндегунимеш зобу нисди. Кор эз дулиймени, сенигЭте дуз вихдем, кифлетмеш эз ме разини. Дие чуй гереки одомире? Ишму чуйтамит? Бесхунигьой довгЮ нисе оморе э ер ишму ?

Ихил: Чуьтам нисе оmore? Омбар зобуниш ве хубиш дирем ме э довгЮ. Дуьшмен бу одомисуьз, вэьш, сурул. Оммо хьовиргьойме муьхкем бирет. Суьфде рафдебирим песово, гьэйр кеширембирим доре хори Ватане. Песде энжом гуьрд бири вилеетиму, рафдим пушово, гьирмиш сохдим дуьшеменгьоре. Эз довгЮ э жендекме е гунле домунди, дуьдуь ведиромори. У ер довгЮи. Бердеймгеш иму довгЮре, дие мегердо ужире синемиши э гЬлом. Гьэгьигьэтиш. Одоми эз хьуьшдеш кеме салгьо зигьисде. Диеш бие дуь-екире куьшим? *(Екем сес нисе сохде. Оморени серпои, овурдени шишей гьирмизине шороб. Ихил декурдени эри гьемме)* Бие гьенжирим и пейлегьоре, гЭилгьойме. Бугу гьемише э хори шолуми, гЭилгьойму сес гунлере не шинову *(вехуьшденуьт, зеренуьт пейлегьоре)*.

Муьсхьуд хундени стихигьой хуьшдере:

ДовгЮ варасд, варасд зимисду.
Омо шолуми, омо вассал.
Дуьл дедегьойму нибу хьэл,
Кор мисохим э богь-бисду.
Шор гердо суьгьде вилеет иму,
Мегердо диеш э гЮуьлом гЭтош.
У эри бебейму гьисди дерму,
Тевесер э имуревоз зиеш.

П е р д е .

С Е Р Н О М Е

Ночог	3
Метлебгьой жовони	10
Довглой кифлети	18
Шефди	60
Дусдогь	89

Иосиф Бахшиев

Пьесогьо

Сборник пьес на языке горских евреев – джуури

Печатается в авторской редакции.

Вёрстка и художественное оформление:

Шауль Симан-Тов

Сборник подготовлен к изданию и выпущен
Центром сохранения и развития национальных традиций,
самобытности языка, культурного
и исторического наследия горских евреев «Sholumi»
при поддержке президента
Международного фонда СТМЭГИ
вице-призидента Российского Еврейского Конгресса (РЕК)
д-ра Германа Рашбиловича Захарьева

www.sholumi.com - sholumi@gmail.com

Подписано к печати: 29.05.2017

© «Sholumi», 2017, Israel



Иосиф Бахшиев родился в 1948 году в городе Дербент в семье колхозника. В 1966 году окончил школу с серебряной медалью. В 1974 году окончил Дагестанский политехнический институт по специальности инженера-технолога, а в 1979 году Московский Государственный Университет им. М.В. Ломоносова, факультет журналистики и получил диплом

журналиста – литературного работника газеты.

За прошедши годы опубликовал сотни своих материалов в городской, республиканской и центральной печати. Работал в штате ряда изданий: «Дагестанский университет», «Избербашский рабочий», «Огни Сулака», «Знамя коммунизма» и других... В последнее время работал в республиканской горско-еврейской газете «Ватан».

Первый сборник стихов на языке джуури «Сес дуьлме» («Голос сердца моего») вышел в 1986 году в Дагестанском Книжном Издательстве, а в 1986 он принял участие в сборнике горско-еврейских поэтов «Ригаз рубаигьо» («Луч солнца»).

В 2016 году, Центром культурного и исторического наследия горских евреев «Sholumi» при поддержке Фонда СТМЭГИ был выпущен авторский сборник стихов Иосифа Бахшиева «Тозе рубаигьо / Новые рубаи» куда вошли четверостишья на джуури и русском.